

**1:1** Tobohulio, tou diipo dunia pilowali mai, Tahuda boito mailoluo. Tahuda woluo pee-peenta wolo Allahu Taála. Wau Tahuda tutuwauwa wolo Allahu Taála. **2** Tumulalo bohulio mai Tio pee-peenta wolo Allahu Taála. **3** Ngoáamilalo pilowali mai lotimbulude o-Lio, wau monto ngoáamilalo uwoluo diaaluo maó penu boli tuwau u pilowali mai wonu diila monto o-Lio. **4** Tahuda boito bungo lo tutumulo, wau tutumulo boito mongohi mai tilango tomanusia. **5** Tilango boito tinetinelo tou modiólomo, wau modiólomo diila mowali momate tilango boito. **6** Dunga-dunggalo mai tailao lo Allahu Taála, tei Yahya tanggulio. **7** Tio lonaó mai lopo habari pasali lotilango boito, alihu ngoáamila tau palacaya. **8** Tio lohihilao diila tilango boito, tio bo mopo habari mai uito. **9** Tilango ututuulio tutu u mopo baangai ngoáamila tau dunga mai ode dunia. **10** Tahuda woluo todunia, dunia pilowali mai lotimbulude o-Lio, bo dunia diila moónuhe o-Lio. **11** Tio dunga-dunga mai odelipu-Lio lohihilao bo bangusaa-Lio diila mololimo o-Lio. **12** Penu boli odito debo woluo olo talo lolimo o-Lio wau palacaya o-Lio: timongolio yilohia-Lio haku lowali Walaó Allahu Taála, **13** tapilo tutulio mai diila lonto manusia, sababu tutumula bohu boito lonto Allahu Taála asaliilio. **14** Tahuda malowali manusia, Tio bilubiluloá to wolotanto, wau ito maloóonto odudaa-Lio. Odudaa boito tilolimo-Lio odelo Walaó Allahu Taála tatuwa-tuwaulo. Lotimbulude o-Lio ito maloóonto Allahu Taála wau ponu-Lio ode olanto. **15** Tei Yahya lonaó mai odelo sakusii-Lio, tio lopo habari: "Tabotieelo Tio tailoiyaaú: Tio mamei dunga meimulo wolau, bo lebe maó udaá wolau, sababu tou wau dipoolu, tio mailoluo." **16** Tio polupolu loponu: diila ohuheli-Lio, Tio mobalakati olanto. **17** Butoó Eeya tilolimonto lotimbulude olei Musa. Bo ponu wau otatapu wau oootolo hilao lo Allahu Taála piloilaalo lotimbulude li Isa Almasi. **18** Diaaluo tapeenta maó loóonto Allahu Taála, ngopohia Walaó tuwa-tuwaulo lo Allahu Taála, u tutuwauwa wolo Allahu Taála wau mohulanga daá wo-Lio. Tiolo talo poilaalo mai Allahu Taála to olanto. **19** Tahidihima kawasa lo Yahudi to Yerusalemu lopoáhu mongo iimamu wau tau-tauwalo Lewi lonaó odelei Yahya wau lohintu olio, "Yio botie tatoonu?" **20** Tei Yahya malongaku wolo juujulu,

"Watia diila Olongia Tamoo-poáahua." **21** "Wonu odito, tatoonu yió?" yilintu maó limongolio. "Wolo yió tei Elia?" "Diila," tametaó lei Yahya. "Wolo yió Nabi?" yilintu maó limongolio poli. "Diila," tametio maó. **22** "Wonu odito, poleleaalo mai olami tatoonu yió botie," uali mongolio, "alihu ami moó tametaó totau-tauwalo talo poáhu mai olami. Wolo u heloiyamu tomimbihu batangamu lohihilao?" **23** Tei Yahya lolametaó, "Watiaalo tio tailoia li Nabi Yesaya: 'Taa u hemo ngiibode tohuta hungayo u luasi daá: Popayade maó dalalo ode Eeya.' " **24** Tau-tauwalo tailao mai taulo Parisi **25** malohintu, "Wonu yió diila Olongia Tamoo-poáahua, diila tei Elia, diila olo nabi, yilongola yió hemo polihu?" **26** Tei Yahya lolametaó, "Watia mopolihu wolo taluhu. Bo tohuungi mongoli woluo taa diila oonuhe limongoli. **27** Tio meidungga mai lapatio maó lowatia, bo u monguádeó tali losapatu-Lio watia diila paatuti." **28** Ngoáamilalo boito lotoduo to Betania, to ambahu Tiimuru lo Dutula Yordan tambati hepopo lihua lei Yahya. **29** Loloombulio mola, tei Yahya loóonto li Isa lonaó mai ode olio. Tulusi tei Yahya loloia maó, "Bilohi, boi-boitolo Walaó Himba lo Allahu Taáala tamo luluto dusa lodunia. **30** Tiolo taheloia laatia mamei dungga mai lapatio maó laatia, bo lebe udaá wolaatia, sababu tou watia diipo pilotutulio mai, Tio mawoluo. **31** Tou dipolulio mai, diila otaawa laatia tatoonu Tio boito. Lebe-lebe pomaó watia lonaó mai mopolihu wolo taluhu alihu bangusa lo Isirailu moóonuheó o-Lio." **32** Tei Yahya olo longohi sakusi odie, "Watia loóonto Rohullah lotuhutai debo odelo poombo lonto hulungo lapataó lotitolaa toita-Tio. **33** Tou boito diipo otaawa laatia tatoonu Tio. Bo Allahu Taáala talo poáhu mai olaatia mopolihu wolo taluhu malo tahuda olaatia, 'Wonu yió moóonto Rohullah motuhutai, lapataó motitolaa toitaato lo ngotaalio, yi Tiolo tamamo polihu wolo Rohullah.' **34** Watia lohihilao maloóonto o-Lio," ualei Yahya, "wau watia mongohi mai sakusi deú Tiolo Walaó Allahu Taáala." **35** Loloombulio mola tei Yahya woluo totambati boito poli wolo taduulota murilio. **36** Tou tio loóonto li Isa yilumaodeó, tio maloloia, "Bilohi! Tiolo Walaó Himba lo Allahu Taáala." **37** Taduuulota muri lei Yahya loódungohe loia boito, tulusi lonaó loduduá li Isa. **38** Ti Isa loili ode wulea, wau loóonto olimongolio donggo hiduduá o-Lio. Tio

malohintu maó, "timongoli hemo lolohe olita?" Tametaó limongolio, "Rabbi, toutoonu biluloá li Rabbi?" ('Rabbi' boliilio maó guru). **39** "Dulo mai bilohi lohihilao," tahuda maó li Isa. Timongolio malonaó wo-Lio wau mota lomilohe toutoonu piloti biluloá-Lio. Wakutu boito jamu ampa lolaango. Todulahu boito timongolio lotibiluloá wo-Lio. **40** Tala ngota lo taduulota tamaloó dungohe wolo uiloiya lei Yahya wau lapataó lonaó loduduá li Isa, deúito-yito tei Andreas, wutatio lei Simon Petrus. **41** Lolamemetaó tei Andreas lololohe olei Simon, wutatio, wau loloiya olio, "Ami malo dunggaya woli Mesiasi!" (Mesiasi tutuuwauwa woli Almasi, deúito-yito: Olongia Tamoo-poáhua). **42** Tei Andreas malo depita mota olei Simon odeli Isa. Ti Isa lolontonga olei Simon, lapataó lotahuda maó, "yió Simon, walaée Yona, yió maunteelo Kepas." (Kepas tutuuwauwa wolei Petrus, bolilio maó: huidee botu.) **43** Loloombulio mola ti Isa lolantu maó u monaó ode Galilea. Tio lodunggaya wolei Pilipus wau lotahuda maó olio, "Dulo dudui mai Wau!" **44** Tei Pilipus asaliilio lonto Betsaida, deúito-yito tambati piloti biluloá lei Andreas wau lei Petrus. **45** Tei Pilipus lodunggaya wolei Natanael wau loloiya maó olio, "Ami maloó dungga tahe untee lei Musa todelomo Buku Butoó lo Allahu Taáala, wau tapilo habari mai lomongo nabi. Tio boito ti Isa talonto Najaret, Walaée Yusu." **46** Bo tei Natanael lolametaó, "Wolo pongalo aakali hitua-tuawua umopiohe meidungga mai monto Najaret?" Dulo mai bilohi lohihilao tametaó lei Pilipus. **47** Ti Isa loóonto olei Natanael lonaó mai, lapataó loloiya pasali olio, "Bilohi, uito taulo Isirailu ututuulio tutu! Diaaluo maó upaluti to olio." **48** "Woloolo mola ti Paaá moóonuhe olaatia?" yilintu maó lei Natanael li Isa. Ti Isa lolametaó, "Tou tei Pilipus diipo lotianga olemu, Wau maloóonto olemu towalungo bungo lo ara boito." **49** "Paaá Guru," loiya maó lei Natanael, "ti Paaá yito Walaó Allahu Taáala! Ti Paaáalo Olongia bangusa lo Isirailu!" **50** Ti Isa lotahuda maó, "Yiό palacaya, bo sababu Wau loloiya mai deú Wau maloóonto olemu towalungo bungo lo ara boito? Susuu-aliyaala ulebe udaá maó tutu woleeto maóontongamu!" **51** Uali Isa poli, "Otutu, pomalacayalo, yiό mamooóonto mola hulungo mohuó, wau maaaa-laikatiyala lo Allahu Taáala laahe bootula to Walaó Manusia."

**2:1** Duuhui mola lapatio maó woluo potihunggu lonika tokota Kana to Galilea, wau tiilo li Isa woluo mola teto. **2** Ti Isa wolo tahiduduá o-Lio tiloduwolio olo ode potihunggu boito. **3** Touí angguru malo pulito, tiilo-Lio loloiya maó odeli Isa, "Timongolio mailo pulita lo angguru." **4** Ti Isa lolametaó, "Maama, diila maó ahuli Watia. Diipo leidungga wakutuulio Watia mopoilaalo batanga." **5** Bo tiilo li Isa loloiya maó to tahi pohintawa, "Wambaó pohutuwalu wolo u mapilo tahuda-Lio olemu." **6** Teto woluo mohelu wolomo tombe upilohetu odelo tambati pongulowalo moduduá uuudu lo Yahudi. Timiidu tombe boito tuangio tanu ngohetuto liiteri. **7** Ti Isa lotahuda maó to tahi pohintawa boito, "Tuangi maó timiidu tombe boito wolo taluhu." Yi matiluanga limongolio tombe boito tunggula lopolu. **8** Lapataó ti Isa lotahuda maó ode limongolio, "Botia hamaawa maó taluhu boito ngoidi wau delowa mai ode tauíwa lo potihunggu. Timongolio malodelo taluhu boito ode tauíwa lo potihunggu." **9** Wau tio lolamitaó taluhu umalo bolió lowali angguru. (Diila otaawalio lonto utoonu angguru boito, bo tahi pohintawa talo luango taluhu boito tamotota). Yi tauíwa lo potihunggu boito lohimbideó ode bulentiti talolai, **10** tulusi lotahuda maó olio, "Biasaalio tau mopo hintapo angguru umopiohe daá meimulo wau wonu tahe tiloduo malotolu longilu, deúito angguru ubiasa. Bo Wutato lolahu angguru u mopiohe daá tunggula botia!" **11** Ui-uitolo bohulo moólinggolabe u pilohutu li Isa. Tio lohutu uito to Kana to Galilea. Wolo tuoto boito Tio lopobilohe odudaá-Lio. Yi tahiduduá o-Lio palacaya o-Lio. **12** Lapataó uito ti Isa lonaó mola ode Kapernaum peé-peéenta woliilo-Lio, mongo wuta-Tio wau tahiduduá o-Lio. Timongolio lotibiluloá mola teto dengolo hui mola hiheolio. **13** Touí Dulahu Buka Paska lo Yahudi malembidei, ti Isa lonaó mola ode Yerusalemu. **14** To Bele lo Eeya to Yerusalemu Tio loódungga tahe mopotaalia losapi, himba, wau bulungi poombo; wau olo tahipo tutuuloá lodoi hihuloá teto. **15** Ti Isa lohutu maó buuboá ngohuí lonto tali tulusi lolanenga ngoáamila binatangi boito, himba wau sapi, lonto delomo Bele lo Eeya. Memee-jawaalo lotaa hipo tutuuloá lodoi hebilantulele-Ngio tilinggula doi limongolio lo pupuulepelo maó. **16** Lapataó Tio lotahuda maó ode tahe mopotaalia lo bulungi poombo, "Bintaáalo ngoáamilalo monteea. Diila maó pohutua Bele li Paapa-U

tambati podaa-hangiyalo!" **17** Yi tahiduduá o-Lio maloéela mola ayati lo Kitabi botie. "Toliangu-U duólo Bele lo Eeya, yaa Allahu Taáala, molumbila hilaa-U." **18** Tahidihima kawasa lo Yahudi helo tehengi li Isa, uali mongolio, "Nte pohutua mai u moólinggolabe odelo tuoto olami deú yió ohaku mohutu maó debo odelo utie." **19** Ti Isa lolametaó, "Lolohubelo Bele botie, wau todelomo utolo hui mola Wau mamuli momongu maó." **20** Lapataó timongolio loloiya, "Wopato pulaa wolomo lotaunu upilo mongulalio Bele lo Eeya botie. Wau Yió mamuli momongu bo todelomo utolo hui?" **21** Bo Bele lo Eeya u milakusudu li Isa yito batanga-Lio lohihilao. **22** Oditolio lapatio maó, tou ti Isa bilongu mai monto opopate, mailoéela mola lo tahiduduá o-Lio deú suáli boito mapeéenta pilotahuda-Lio. Yi malo malacaya timongolio tou wolo u tulatuladu todelomo Kitabi wau tou wolo u tilahuda li Isa. **23** Tou ti Isa donggo to Yerusalemu tou Lameyangi lo Paska, dadaata taa palacaya o-Lio sababu ngoáamila moólinggolabe u hepilohutu-Lio. **24** Boti Isa lohihilao diila palacaya olimongolio, sababu oonuhe-Lio ngoáamila tau. **25** Diila palalu tau mongohi tombango to o-Lio pasali penu boli olo tatoonu wambaó, sababu otaawa-Lio lohihilao wolo uwoluo todelomo hilaa lomanusia.

**3:1** Woluo ngotaalio taótanggulo to agama towimbihu taulo Parisi tailunte Nikodemus. **2** Tou huilio tuwau tio lonaó mai odeli Isa wau loloiya maó, "Paaá Guru, otaawa lamiaatia ti Paaá tailao mai lo Allahu Taáala. Sababu diaaluo penu boli ngotaa maó tamowali mohutu u moólinggolabe debo odelo upilohutu li Paaá, Wonu Allahu Taáala diila wolio." **3** Ti Isa lolametaó, "Pomalacayalo, diaaluo penu boli ngotaa maó tamowali pongawaá umati lo Allahu Taáala, wonu tio diila muli potutuolio mai." **4** "Diila pongalo aakali tamaa iludaá muli potutuolio mai," loiya maó lei Nikodemus odeli Isa, "Tingga mowali tio muli tumuwoto ode delomo talomo liilolio wau muli pututuolio mai?" **5** Ti Isa lolametaó, "Otutu banali tahuda-U botie: Wonu tau diila potutuolio mai monto taluhu wau monto Rohullah, tau boito diila mowali pongawaá umati lo Allahu Taáala. **6** Manusia odelo pohuli lotapu pilotutu mai lomongo dulaalio, bo odelo pohuli lorohani pilotutu mai lo Rohullah. **7** Diila maó polinggolabu wonu

Wau motahuda mai: timongoli ngoáamila paatuti muli potutuolio mai. **8** Dupoto mohiipo deutoonu otohilaalio; ito moódungohe tingohio, bo diila otaawanto monto utoonu dudunggaalio mai wau deutoonu dulungio. Odito olo wolo taa potutuo mai lo Rohullah." **9** "Woloolo mola uito mowali motoduo mai?" yilintu lei Nikodemus. **10** Ti Isa lolametaó, "Yio Guru lo agama to Isirailu; diila pongalo aakali diila otaawamu? **11** Pomalacayalo; ami mobisala bo tomimbihu wolo u otaawa lami, wau ami mongohi sakusi bo tomimbihu wolo umaa iloontonga lami; bo timongoli diila mohuto mololimo u silakusia lami. **12** Timongoli diila palacaya wonu Wau mohungguli mai olimongoli pasali susuu-aliyaala lodunia botie; woloolo mola timongoli mowali palacaya, wonu Wau mohungguli mai olimongoli pasali lo sologa? **13** Diaaluo penu boli ngotaa tapeéenta maó lobotula mola ode sologa, ngopohia Tio tamalo laahei ode dunia, deúto-yito Walaó Manusia. **14** Tutuuwauwa debo odelo tei Musa malopo botula mola tulidu tombaha tobatango ayu ngoputu tohuta datahu u luasi daá wau delita, odito olo Walaó Manusia paatuti pobotulolo, **15** alihu ngoáamila taa palacaya o-Lio moótapu tutumulo ututuulio tutu wau ohiheo-hiheolo maó." **16** Sababu Allahu Taáala odito momonu mai manusia todunia botie, tilinggula Allahu Taáala longohi mai Wala-Io tatuwa-tuwaulo, alihu timiidu taa palacaya o-Lio diila binasa, bo moótapu tutumulo ututuulio tutu wau ohiheo-hiheolo maó. **17** Sababu Allahu Taáala lolao Wala-Io diila mai momutoó dunia botie, bo mai mopoáahu maó. **18** Taa palacaya o-Lio diila hukuu-maniyola. Bo taa diila palacaya mahi lukuumani lo Allahu Taáala, sababu tio diila palacaya to Walaó Allahu Taáala tatuwa-tuwaulo. **19** Tio pilohile moóohuu dadaasali tosuáli botie; Tilango boito malei dungga mai ode dunia, bo manusia lebe motohilaa u modiólomo wolo u mobaango, sababu huhutu limongolio moleeto. **20** Timiidu taa hipohutua u moleeto, molonuó u mobaango; tio diila motohilaa u mobaango, alihu huhutuulio u moleeto diila oontonga. **21** Bo taa u hipohutua kahandaki lo Allahu Taáala monaó mai ode mobaango alihu mowali moilaalo deú wolo u pilohutulio boito yito moduduá kahandaki lo Allahu Taáala. **22** Lapataó uito ti Isa wau tahiduduá o-Lio malonaó ode Yudea. Tio lotitolaa mola teto dengolo wakutu hiheolio woli mongolio wau helo polihu tau. **23** Tou boito tei

Yahya diipo tilumuwoto ode tutupa. Tio helo polihu to Ainom, diila molamingo monto Salim, sababu mola teto dadaata taluhu. Tau-tauwalo helonaó mai ode olio, wau tio lopolihi olimongolio. **25** Dengolo lota tahiduduá olei Yahya helo haamawa wolo taulo Yahudi pasali lowuúdu u mopoo belesi. **26** Timongolio lonaó mota odelei Yahya, wau loloiya maó, "Paaá Guru, wolo donggo oéela mola li Paaá tapeé-peéenta woli Paaá to ngotuwali lo Dutulaa Yordan boito, tou boito pilotunu mai li Paaá olamiaatia omoómolu? Tio masaatia olo hemo polihu, wau ngoáamila tau hiponaówa ode o-Lio!" **27** Tei Yahya lolametaó, "Manusia diila mowali owolo-wolo wonu tio diila wohia mai lo Allahu Taáala. **28** Timongoli lohihilao maloó dungohe olaatia loloiya mai, 'Watia diila Olongia Tamoo-poáahua. Watia ilutolia leimulo mai wo-Lio.' **29** Bulentiti taabua yito hakuulio libulentiti talolai. Sahabati libulentiti talolai boito wambaó tihutihula totili wau modungohe, wau tio sanangi wonu modungohe suala libulentiti talolai. Odito olo wolaatia. Masaatia watia sanangi daá. **30** Tioolo tamusi helebe polohuna daá, wau watia diila boti polohuna daá." **31** Tadungga-dungga mai monto yitaato mongilabotaó lou ngoáamilalo. Tadungga-dungga mai monto dunia, meituwoto tau lodunia, wau mobisala pasali lodunia. Tio tadungga-dungga mai monto yitaato mongilabotaó lou ngoáamilalo. **32** Tio mobisala tomimbihu wolo umaa iloontonga wau ilodungohe-Lio, bo diaaluo penu boli ngotaa maó tapalacaya tou silakusia-Lio. **33** Taa palacaya tou silakusia-Lio boito, motolongaku maó deu Allahu Taáala banali. **34** Sababu taa uilao mai lo Allahu Taáala mopo tunggulai tataa-heyaalo Allahu Taáala, sababu Rohullah mailohi ode o-Lio lealeaatulo maó. **35** Allahu Taáala momonu Wala-Io, wau malohudu totoonulalo kawasa to o-Lio. **36** Taa palacaya to Walaó boito mamootapu tutumulo ututuulio tutu wau ohiheo-hiheolo maó. Bo taa diila modungohe to Walaó boito diila moótapu tutumulo. Tio hukuumanio lo Allahu Taáala u ohiheo-hiheolo maó.

**4:1** Tau-tauwalo Parisi loódungohe deu ti Isa loótapu wau helo polihu lebe dadaata maó muri wolei Yahya. ( **2** Otutuulio maó ti Isa lohihilao diila lopolihi bo tahiduduá o-Lio wambaó.) **3** Tou ilotaawa li Isa deu

tau-tauwalo Parisi maloó dungohu pasali losuáli boito, Tio malo monggato lonto Yudea lohualinga ode Galilea. **4** Todelomo nonaóo-Lio boito Tio musi lumaodeó to Samaria. **5** Yi malei dungga ti Isa tokota tuwau to Samaria u iluntee Sikhar, diila molaminga monto huta u muloololio mai yilohi lei Yako odelei Yusu walaio. **6** Mota teto woluo ali lei Yako. Ti Isa moongolo daá sababu nonaóo-Lio boito, sababu uito Tio lotihuloáa tobiihu ali. Tou boito otanu dulahu matotai, **7** wau tahidudua li Isa malonaó ode kota mota lotali mai uáalo. Lapataó taabua ngota lo Samaria mai lolime taluhu. Ti Isa lotahuda maó olio, "Ibu, mowali Watia mohile taluhu uilumolo?" **9** Taabua lo Samaria boito lolametaó, "Ti Tuani taulo Yahudi, wau watia taulo Samaria; yilongola ti Tuani mohile uilumolo monto olaatia?" (Sababu tau-tauwalo Yahudi diila owumbuta wolo taulo Samaria). **10** Ti Isa lolametaó, "Humayaalio otaawamu wowohi mai lo Allahu Taáala wau tatoonu talohile taluhu olemu, tantuulo maó yió lohihilao tamohile uilumolo to o-Lio, wau Tio mamongohi mai olemu taluhu lo tutumulo." **11** Loiya maó lotaabua boito, "Ti Tuani diila otuuntu, wau ali botie modeloma daá. Monto utoonu ti Tuani moótapu mai taluhee lo tutumulo? **12** Tei Yako, tipaapa loluuhuru lamiaatia, longohi mai ali botie. Tio lohihilao malohama taluhu yililumio lonteea; odito olo mongo walaio wau binatang bibiaahio. Wolo tolantobu li Tuani deu ti Tuani talebe udaá wolei Yako?" **13** "Taa mongilu taluhu botie mamuli mototoángo," tahuda maó li Isa, **14** "bo taa mongilu taluhu u mawohi-U mai madiilalo mototoángo poli ohiheo-hiheolo maó. Sababu tahulu u mawohi-U boito mamowali mato lotaluhu todelomo batangalio u mopenTelai ode bulemengio wau mongohi olio tutumulo ututuulio tutu wau ohiheo-hiheolo maó." **15** Loiya maó lotaabua boito. "Tuani wohiyalo mai taluhu boito olaatia alihu watia diilalo mototoángo; wau watia diilalo palalu mohualingai odia mai mohama taluhu." **16** "Ponaólo, mota tianga mai dilemu, lapataó muli pohualingai," tahuda maó li Isa. **17** "Watia diila odile," tametaó lotaabua boito. "Memangi otutu loiyamu," tahuda li Isa, **18** "Sababu yió mapoóolimo lonika, wau talolai tatumu-tumulo wolemu botia diila dilemu." **19** "Botia mailotaawa lowatia ti Tuani nabi ngota," loiya lotaabua boito. **20** "Nenemoya lamiaatia helolubo Allahu Taáala tohuludu



botie, bo bangusa li Tuani malo loiya deu bo to Yerusalemu wambaó tambatilio polubowa lotau to Allahu Taáala." **21** "Pomalacayalo," tahuda li Isa olio, "Tosaaáti tuwau tau mamolubo Allahu Taáala, diilalo tohuludu botie wau diila olo to Yerusalemu. **22** Timongoli taulo Samaria hipolubowa tadiila otaawa limongoli, hiambola ami taulo Yahudi hemolubo o-Lio taótaawa lami, sababu osalaamati dudunggaalio mai monto taulo Yahudi. **23** Bo wakutuulio mamei dungga, tumbaó malei dungga mai, deu wolo kawasa lo Rohullah tau-tauwalo mamolubo li Paapa odelo Allahu Taáala tabanali debo odelo u otohilaa li Paapa. **24** Sababu Allahu Taáala boito Rohu, wau bo wolo kawasa lo Rohullah tau-tauwalo moótubo li Paapa odelo woloolo mola Tio woluo." **25** Taabua boito loloiya maó li Isa. "Otaawa lowatia Olongia Tamoo-poáahua (tailunte Almasi) mamei dungga. Wonu Tio meidungga, Tio mamó poótaa totoonulalo u hitua-tuawua to olanto." **26** "Waulo Tio," tahuda li Isa, "Wau tabotia donggo hemo bisala wolemu." **27** Tou boito tahiduduá li Isa lohualingai. Timongolio lolinggolabu loóonto li Isa hemobisala wolo taabua ngota. Bo diaaluo penu boli ngotaa maó limongolio talohintu totaabua boito, "Ti ibu palalu wolo?" meaalo lohintu toli Isa, "Yilongola ti Paaá hemobisala wolo taabua boito?" **28** Yi taabua boito lololaa maó tombelio teto lapataó tilumeteó ode kota wau loloiya totau-tauwalo mola teto. **29** "Dulo mai bilohi talo poótaa mai olaatia totoonulalo hitua-tuawua u mapeéenta pilohutu lowatia. Wolo otanu Tiolo boito Olongia Tamoo-poáahua?" **30** Yi tau-tauwala boito olo malo lolaa maó kota tulusi lonaó odeli Isa. **31** Tou boito tahiduduá o-Lio malo loduo li Isa lolamelo, "Paaá Guru," uali mongolio, "toduwolo molamelo." **32** Boti Isa lolametaó, "Woluo uáalo to ola-U, udiila otaawa limongoli." **33** Yi tahiduduá o-Lio mahipo hihintua, "Wolo woluo talodelo mai uáalo ode o-Lio?" **34** Lapataó ti Isa lotahuda maó, "Uáalo-U yito moduduá u otohilaa-Lio lo tamalolao mai ola-U, wau mopoo lapato kalaja uiludu-Lio mai ola-U. **35** Timongoli hemoloiya, 'Donggo wopato hula mola sembo pongotolaalo.' Bo Wau molojiya mai olemu: Bilohi mota hahaa-laboluwalu u mahilalahe, dapadapato otololo: **36** Taa u mongotolo malo lumulaó hipo lolimoa wuupalio wau hipo himoa tilapulio duólo tumumulo ututuulio tutu wau

ohiheo-hiheolo maó. Yi taa u momuáyadu wau taa u mongotolo mowali motisanangi peé-peénta. **37** Lumadu botie otutu olo, 'Tangota mopomulo, tawewo mongotolo.' **38** Wau mopoáhu olimongoli mota mongotolo to halabolu udiila tilolopani limongoli; taawewo malo kalaja mola teto, wau timongoli tamololimo paéeda lokalaja limongolio." **39** Dadaata taulo Samaria tuango kota boito palacaya li Isa, sababu taabua boito loloiya, 'Tio lolele mai to olaatia totoonulalo hitua-hituawua u mapeéenta pilohutu lowatia.' **40** Yi tou tau-tauwalo Samaria boito lodunggay woli Isa, timongolio lohile tiótotutua alihu Tio motibiluloá woli mongolio. Oditolio ti Isa malo tibiluloá teto duuhui mola hiheolio. **41** Lapataó lebe dadaata maó poli taa palacaya li Isa sababu wolo u hepilo ngaajali-Lio lohihilao olimongolio. **42** Timongolio loloiya maó ode taabua boito, "Ami palacaya masaatia, diila bo kalena u pilolelemu mai olami, bo sababu ami lohihilao malo dungohe o-Lio, wau otaawa lami deú Tio memangi Tamoo-poáahua dunia." **43** Lapataó duuhui mola lotibiluloá to Sikhar, ti Isa lonaó mola ode Galilea. **44** Ti Isa lohihilao malo tahuda, "Nabi ngota diila hulumatiolio to lipulio lohihilao." **45** Bo tou Tio leidungga mola ode Galilea, tau-tauwalo mola teto lolutulaó o-Lio wolo hiwengahe, sababu timongolio woluo to Yerusalemu to Dulahu Buka Paska, wau maloóonto ngoáamila u hepilohutu li Isa. **46** Lapataó ti Isa luli lohualingo ode Kana to Galilea, toutoonu Tio mapeéenta lomolió taluhu lowali angguru. Tokota boito woluo pogawee ngota lo pamalenta, walaio donggo mongongoto to Kapernaum. **47** Tou ilodungohelio deú ti Isa malei dungga ode Galilea lonto Yudea, tio malonaó mota odeli Isa wau loloduo li Isa ode Kapernaum u mopoóluli walaio ungopee mate. **48** Ti Isa lotahuda maó ode pogawee lo pamalenta boito, "Wonu timongoli diila loóonto totoonulalo moólinggolabe, yi timongoli diila palacaya." **49** "Tuani," ualo pogawee lo pamalenta boito, "aliheó ponaólo mai tou walaó lowatia boito diipo mate." **50** Tahuda maó li Isa olio, "Pohualingolo, walaumu moluli." Tau boito palacaya u tilahuda li Isa, tulusi tio malonaó. **51** Tohuungo dalalo, tahi pomayalio malonaó mai ode olio wau lopohabari maó, "Walai Tuani maloluli." **52** Lapataó tio malohintu olimongolio, jamu ngoolo walaó boito loluli. Timongolio lolametaó, "Olaango tanu jamu satu mohulonu polipitio

yilooli." **53** Lapatao tiyamo lowalao boito looeela mola deu tosaati boito ti Isa lotahuda olio, "Walaumu moluli." Yi tio wau ngoamila ngaalaalio palacaya li Isa. **54** Uitolo u moolingolabe oluolio u pilohutu li Isa to Galilea tou dudungaa-Lio mai lonto Yudea.

**5:1** Lapatao uito woluo lameyangi lo Yahudi, yi ti Isa lona o mola ode Yerusalemu. **2** To Yerusalemu totili "Huhebu lo Himba" woluo kulamu tuwau, u todelomo bahasa lo Ibrani iluntee Betesda. Mota teto woluo sulambe mohelu limo. **3** To susuu-lambeyalo boito dadaata taa mongongoto hibalata; woluo taapitoo, woluo taapenggo, wau woluo tadidu mowali monao. Timongolio ngoamila hipo himawa taluhu tokulamu boito mobuolai. **4** Sababu tingga maito malaikati lo Eeya motuhutai ode delomo kulamu boito wau mopo buolai taluhio. Wau tahi ngongota tabohulio tumuwoto ode delomo kulamu boito tou taluhio donggo mobuolo mamoluli penu boli ngongota wolo u hedutolalio. **5** Totambati boito woluo talolai ngota u ngongotio matolo pulaa walu lotaunu hiheolio. **6** Ti Isa loonto olio balabalata mola teto, wau otaawa li Isa deu tio malohiheo daa mongongoto; yi ti Isa malohintu olio, "Mohuto yio moluli?" **7** Taa mongongoto boito lolametao, "Paaa, diaaluo taatewe umopo tuwota o laatia ode delomo kulamu tou taluhio mobuolai. Wau tou watia maode kulamu, taawewo maa tilumuwoto leimulo." **8** Yi ti Isa lotahuda ma o olio, "Bongulo mola, bintaalo amongumu wau ponaolo." **9** Tou boitolo olo tau boito loluli. Tio malo mintaa amongio wau lona o. Suali boito lotoduo mai todulahu Saabati. **10** Sababu uito tahidihima kawasa lo Yahudi malo loiya totaa boheli loluli ma o boito, "Dulahu botie dulahu Saabati. Yio diila mowali momintaa amongumu." **11** Bo tau boito lolametao, "Taa u lopooluli mai laatia engonti boito talo poahu laatia lomintaa amongo lowatia wau loponao." **12** "Tatoonu Tio talo poahu olemu lomintaa amongumu wau lonona o?" yilintu ma o limongolio. **13** Bo tailoluli boito diila lotota tatoonu taulio, sababu ti Isa mailooli lomola towolota lotaa dadaata boito. **14** Lapatao ti Isa lodunggaya wolo tau boito todelomo Bele lo Eeya, wau lotahuda ma o olio, "Botia yio maloluli. Diilalo pohutu dusa, alihu yio diila moolaasa mai suali ulebe moleetao."

**15** Yi malonaó tau boito lapataó lopoótaa to tahidihima kawasa lo Yahudi deu ti Isaalo talo pooluli olio. **16** Wau sababu uito timongolio mahipo tolopania mopoósuusa li Isa, sababu Tio lopoóluli tau todulahu Saabati. **17** Boti Isa lotahuda maó olimongolio, "Allahu Taaála debo hemo kalaja tunggula botia, wau Wau olo musi mokalaja." **18** Tahuda boito maloó sababu to tahidihima kawasa lo Yahudi lebe maó hipo tolopania u momate o-Lio mate-mateelo maó. Timongolio lohutu uito, diila bo sababu u Tio lolambanga wuúdu lo agama tomimbihu dulahu Saabati, bo olo kalana Tio malo tahuda deu Allahu Taaála boito ti Paapa-Lio; boliilio maó Tio mopo tutuuwauwa batanga-Lio wolo Allahu Taaála. **19** Ti Isa lolametaó ode tau-tauwala boito odie, "Pomalacayalo, Walaó diila mowali mohutu wolo-wolo, wolo kawasaa-Lio lolohilao. Tio bo mohutu wolo u iloontonga-Lio pilohutu li Paapa-Lio. Sababu wolo u pilohutu li Paapa-Lio, uito olo u pohutuo lo Walaó. **20** Sababu Allahu Taaála lomonu to Walaó wau lopobilohei o-Lio ngoáamila u pilohutu-Lio lohihilao. Tumbaó Allahu Taaála mamopo bilohei o-Lio totoonulalo huhutu ulebe udaá maó poli tilinggula timongoli molinggolabe. **21** Allahu Taaála boito mopobongu mai taamate, wau mongohi olimongolio tutumulo ututuulio tutu wau ohiheo-hiheolo maó; odito olo Walaó mongohi mai tutumulo u ohiheo-hiheolo maó totaa mohuto wohia-Lio tutumulo. **22** Allahu Taaála lohihilao diila momutoó boli olita. Ngoáamila kawasa u momutoó mailudu-Lio to Wala-Io. **23** Allahu Taaála lohutu uito alihu ngoáamila tau mohulumati to Walaó debo odelo timongolio mohulumati to Allahu Taaála. Taa diila mohulumati to Walaó diila mohulumati olo to Allahu Taaála tamalolao mai to Walaó. **24** Otutu banali totoonulalo tahudaa-U botie: Taa umopoó tuotaó totoonulalo tahudaa-U, wau palacaya o-Lio talolao mai ola-U, o tutumulo ututuulio tutu wau ohiheo-hiheolo maó. Tio diila tahukuu-maniyolo; tio malo lopato lonto opopate wau loótapu tutumulo. **25** Pomalacayalo: Mamei dungga wakutuulio -- tumbaó malei dungga wakutuulio -- taamate mamo dungohe suala lo Walaó Allahu Taaála. Wau taa modungoheó matumumulo. **26** Debo odelo Allahu Taaála lohihilao bungo lo tutumulo, yi Tio olo mopowali mai wala-Io bungo lotutumulo. **27** Tio malohudu ode wala-Io haku u momutoó, sababu Tio

Walaó Manasia. **28** Diila maó polinggolabu timongoli modungohe suáli botie, sababu wakutuulio mamei dungga deú ngoáamila taa mailate modungohe sualaa-Lio, **29** lapataó lumualai monto kuubulu. Taa malohutu u mopiohe mamobongu mai ode tutumulo. Bo taa malohutu u moleeto mamobongu mai u hukuu-maniyolo." **30** "Wau diila mowali mohutu wolo-wolo moduduá otohilaa-U lohihilao. Wau bo momutoó motuuide lou wolo u pilomalentai lo Allahu Taála. Wau putuusani-U aadili, sababu Wau diila moduduá u otohilaa-U lohihilao, bo wambaó u otohilaa lo Allahu Taála talolao mai ola-U. **31** Humayaalio Wau mongohi mai sakusi pasali lobatanga lohihilao, diila mowali palacayalo. **32** Bo woluo taawewo tamongohi sakusi tomimbihu ola-U, wau otaawa-U deú u silakusialio boito otutu. **33** Timongoli malolao utolia odelei Yahya, wau tio malongohi sakusi ubanali tomimbihu ola-U. **34** Suáli botie tahudaa-U mai, diila bo sababu Wau momalalu sakusi monto manasia, bo alihu timongoli poáahuwolo. **35** Tei Yahya boito debo odelo tohe ulei-leiita wau mopo bulilangai lotilango. U ngopeeé mola wakutu timongoli sanangi mololimo tinelio boito. **36** Bo u silakusiya-U lebe udaá maó lou silakusia lei Yahya. Wolo u masaatia pilohutu-U botie, deúito-yito kalaja u pilotuugasi mai li Paapa ola-U, u mopobukuti deú ti Paapa malolao mai ola-U. **37** Wau ti Paapa talolao mai ola-U olo longohi sakusi pasali ola-U. Timongoli diipo peéenta maó lodungohe sualaa-Lio meaalo loóonto baya-Lio. **38** Tataahe-Lio diila leitahu todelomo hilaamu sababu timongoli diila palacaya to ola-U tailao-Lio mai. **39** Timongoli mopooolato kitabi sababu helantobu limongoli deú wolo dudelo boito timongoli otutumulo ututuulio tutu wau ohiheo-hiheolo maó. **40** Bo timongoli diila motohilaa monaó mai ode ola-U u moótapu tutumulo ohiheo-hiheolo maó. **41** Wau diila mololohe poloilaalo momuji monto manasia. **42** Oonuhe-U timongoli. Otaawa-U timongoli diila motolianga to Allahu Taála todelomo hilaamu. **43** Wau dungga-dungga mai wolo kawasa li Paapa-U, bo timongoli diila mololimo ola-U. Bo wonu taawewo dungga-dungga mai wolo kawasaalio lohihilao, timongoli motohilaa mololimo olio. **44** Woloolo mola timongoli moó palacaya, wonu timongoli bo ohilaa meipuji monto timongotamu, wau diila motolopani u moótapu poloilaalo momuji monto Allahu Taála u

Tuwa-tuwaulo? **45** Diila maó polantobu Wau mamopotala olimongoli totalu lo Allahu Taáala. Tumbaó tamaa mopotala olimongoli yito tei Musa. **46** Humayaalio timongoli palacaya olei Musa, timongoli mapalacaya to ola-U, sababu pasali-Ulo tunggula tio loluladei. **47** Bo wonu timongoli diila palacaya tou wolo u tiluladio lei Musa, woloolo mola timongoli moó palacaya tou wolo upilo tahudaa-U mai?"

**6:1** Dengolo wakutu lapatio maó ti Isa lonaó mola ode ngotuwali lobulalo Galilea, u ilunte olo Bulalo Tiberias. **2** Leidungga mola odito, dadaata talo duduá o-Lio sababu timongolio maloóonto u moólinggolabu hepilohutu-Lio wolo lopoóluli tahi ngongota. **3** Ti Isa lotaódee mola ode huludu, lapataó lotihuloá mola teto wolo tahiduduá o-Lio. **4** Towakutu boito mabolo ngopeé mola Dulahu Buka Paska lo Yahudi. **5** Tou ti Isa lomilohe mota ode pali-Tio, Tio loóonto taa dadaata hinaówa mai ode o-Lio. Yi Tio lotahuda maó odelei Pilipus. "Touitoonu mowali potaliyanto uáalo, alihu ngoáamila tau botie mowali molamelo?" ( **6** Mailotaawa li Isa wolo u mapo hutuo-Lio, bo Tio lotahuda maó odito sababu Tio motohilaa motesi olei Pilipus.) **7** Tei Pilipus lolametaó, "Roti u ngohalaga dulo hetuto doi talaá diila tamoó tuheta totau-tauwalo botie, eleponu ngota-ngota bo moótapu ngoidi wambaó." **8** Ngotaalio lomuri li Isa wewolio deúito-yito tei Andreas, wutatei Simon Petrus malo loiya, **9** "Tewe woluo walaó talolai wolo limo lobotu roti wau uponula dulo botu. Bo wolo boliilio uito totaa dadaata botie?" **10** "Ahulaalo mota tau-tauwalo boito motihuloó," tahuda maó li Isa. Totambati boito o huóyoto dadaata, oditolio tau-tauwala boito malo tihuloó to huóyoto -- ngoáamilalo tanu limo lolihu lota mongo lolai. **11** Lapataó ti Isa malohama roti boito tulusi losukuru mola ode Allahu Taáala. Lapataó uito Tio lolaya-layadeó roti boito totaa dadaata. Lapataó Tio lolaya-layadeó uponula boito, wau timongolio malo lamelo lotolu-toluulo maó. **12** Lapataó ngoáamilalo malo lamelo tunggula lobutuhu ti Isa lotahuda ode tahiduduá o-Lio, "Yimoálo labitio lo uáalo boito; diila bolo woluo u mohuáyadu." **13** Lapataó timongolio malo himoá mopulaa dulo kalanji hipolua lebe lo uáalo monto limo lobotu roti upilo lamela lotaa dadaata boito. **14** Tou taa dadaata

loóonto maó moólinggolabe u pilohutu li Isa, timongolio malo loiya, "Otutu, utieelo Nabi tahe halapuwolo meidungga mai ode dunia!" **15** Otaawa li Isa timongolio malonaó monaó mai momakusa o-Lio mowali olongia limongolio. Sababu uito Tio malolahi ode madala ohuludu. **16** Tou mahemo diólomai, tahiduduá li Isa lotuhutaa mola ode bulalo. **17** Lapataó timongolio malo titaé tobulotu lobalango bulalo boito lotidulunga ode Kapernaum. Dulahu malo diólomai ti Isa debo diipo leidungga mai ode limongolio. **18** Tou boito bulalo mahemo buóolai sababu dupoto daá. **19** Tou malobite mota tanu limo meaalo wolomo kilo, timongolio loóonto mota li Isa tahu-tahudei ode bulotu wau naónaó totudu lotaluhu. Timongolio mailoohe daá. **20** Boti Isa lotahuda olimongolio, "Diila oohe, utie Wau!" **21** Tulusi wolo sanangi lohilao timongolio malo lolimo o-Lio ode delomo bulotu, wau tosaaátilo boito bulotu limongolio boito malei dungga mota ode tambati u pilatuju. **22** Loloombulio mola taa dadaata tadonggo leitolaá to ngotuwali lobulalo, lotota loutau deú engontielio bo woluo bulotu tuwau mola teto. Otaawa limongolio deú tahiduduá li Isa malo monggata mota wolo bulotu boito, hiambola ti Isa diila loduduó. **23** Lapataó demohelu ngoolo bulotu lonto kota lo Tiberias leidungga mai wau lotirabua totili lotambati lotaa dadaata boito hipo lamela roti u mailapato silukuru mola lo Eeya. **24** Tou taa dadaata boito loóonto deú mopio ti Isa meaanto tahiduduá o-Lio diaaluo teto, timongolio olo malo titaé to bubuu-lotuwalo boito wau lobite ode Kapernaum mola mololohe li Isa. **25** Tou tau-tauwala boito lodunggaya woli Isa to ngotuwali lobulalo, timongolio lohintu o-Lio, "Paaá Guru, omolua ti Paaá leidungga mai odie?" **26** Ti Isa lolametaó, "Otutu, timongoli hemo lolohe ola-U diila bo sababu timongoli malo ngalati makusudu totoonulalo moólinggolabe u hepilohutu-U, bo sababu timongoli malo lamela tunggula lobutuhu. **27** Diila maó pokalaja u moótapu mai uáalo u mowali mopulito wau mobunuto. Pokalajaalo u moótapu mai uáalo udiila mowali mobunuto u mongohi tutumulo ututuulio tutu wau ohiheo-hiheolo maó. Uáalo boito mawohi mai lo Walaó Manusia olemu, sababu Tio mapiluduó lo Allahu Taaála." **28** Lapataó timongolio lohintu maó o-Lio, "Amiaatia musi mohutu maó wolo u moponaó kahandaki lo Allahu Taaála?" **29** Ti Isa lolametaó, "Utieelo u otohilaá lo

Allahu Taáala monto olimongoli: pomalacayalo o-Lio tailao mai lo Allahu Taáala." **30** "Wonu odito," uali mongolio, "bukuti wolo u mowali wohi mai li Paaá alihu amiaatia moóonto wau palacaya li Paaá? Wolo u mapohutuo li Paaá? **31** Tinenemoya lamiaatia lolamela manna tohuta datahu u luasi daá wau delita, debo odelo u leitulade todelomo Kitabi, 'Tio longohi olimongolio uáalo roti lonto sologa!' " **32** Lapataó ti Isa lotahuda maó olimongolio, "Pomalacayalo: Diila tei Musa, boti Paapa-Ulo tamongohi mai olemu roti u otutuulio maó monto sologa. **33** Sababu roti uwahi mai lo Allahu Taáala yito Tio tamo tuhutai monto sologa wau mongohi tutumulo ode manusia todunia." **34** "Paaá," uali mongolio, "wohiyalo mai laito roti boito ode lamiaatia." **35** "Wau lo roti tamongohi mai tutumulo," tahuda maó li Isa olimongolio. "Taa u monaó mai ode ola-U diila tapolaangolo poli u ohiheo-hiheolo maó." Wau taa u palacaya ola-U diila tamotoángo poli u ohiheo-hiheolo maó. **36** "Bo debo odelo u mapilo tahuda-U mai olemu, eleponu timongoli maloóonto ola-U, timongoli diila palacaya. **37** Ngoáamila tailudu mai li Paapa ode ola-U mamonaó mai ode ola-U. Wau diila tamopo touli boli tatoonu tamonaó mai ode ola-U. **38** Sababu Wau lotuhutai lonto sologa, diila mai mohutu u otohilaa-U lohihilao, bo u otohilaa-Lio lo talolao mai ola-U. **39** Wau uti-utieelo u otohilaa-Lio lo talolao mai ola-U: alihu monto ngoáamila tailudu-Lio mai ola-U, diaaluo penu boli ngotaa maó tamooli; bo alihu Wau mopobongu mai olimongolio to Dulahu Kiama. **40** Memangi uti-utieelo u otohilaa li Paapa-U: alihu ngoáamila tau moóonto to Walaó boito wau palacaya o-Lio o tutumulo tutu wau ohiheo-hiheolo maó, wau muli bongulo-U mai to Dulahu Kiama." **41** Tau-tauwalo Yahudi maloingo toli Isa, sababu Tio lotahuda: "Wau roti talo tuhutai lonto sologa." **42** Timongolio loloiya maó, "Diila maa Tio botie ti Isa walaée Yusu? Otaawa lami mongo dulaá-Lio! Woloolo mola Tio mowali molojiya deú Tio malo tuhutai lonto sologa?" **43** Lapataó ti Isa lotahuda ode limongolio, "Diila maó poingo. **44** Diaaluo penu boli ngotaa tamowali monaó mai ode ola-U, wonu Allahu Taáala talolao ola-U, diila modelo mai olio ode ola-U; wau tatoonu tamonaó mai ode ola-U, mabongulo-U to Dulahu Kiama. **45** Todelomo Buku lomongo nabi tulatulade odie, 'Ngoáamila tau maáalarío lo Allahu Taáala.' Oditolio



ngoáamila taa modungohe li Paapa-U wau mobalajali monto o-Lio, monaó mai ode ola-U. **46** Uito diila oboliilio deü woluo tamaa loóonto li Paapa-U. Bo Tio tadungga-dungga mai lonto Allahu Taáala, maloóonto li Paapa. **47** Ototai maó: Taa u palacaya, o tutumulo ututuulio tutu wau ohiheo-hiheolo maó. **48** Waulo roti tamongohi mai tutumulo. **49** Tinenemoyamu lolamelo manna tohuta datahu u luasi daá wau delita wau timongolio yilate olo. **50** Bo diila odito wolo roti u lotuhutai lonto sologa; taa u molamela roti boito diila tamaate. **51** Waulo roti u lotuhutai lonto sologa -- roti u mongohi tutumulo. Taa u molamela roti botie matumumulo ohiheo-hiheolo maó. Roti u mawohi-U ode tutumulo manusia todunia ui-uitolo tapu-U." **52** Loódungohe uito, tau-tauwalo Yahudi mahipo hahaamawa ngota-timongota. "Woloolo mola tau botie mowali mongohi tapu-Lio ode olanto u polamelo?" uali mongolio. **53** Lapataó ti Isa lotahuda maó olimongolio, "Pomalacayalo: Wonu timongoli diila molamelo tapu lo Walaó Manusia wau mongilu duhu-Lio, timongoli diila taótu-otutuulo maó tumumulo. **54** Taa u molamelo tapu-U wau mongilu duhu-U o tutumulo ututuulio tutu wau ohiheo-hiheolo maó wau Wau mamopo bongu mai olio to Dulahu Kiama. **55** Sababu tapu-U tutuulio tutu uáalo, wau duhu-U tutuulio tutu minumani. **56** Taa u molamelo tapu-U wau mongilu duhu-U, debo motituwau wola-U, wau Wau wolio. **57** Allahu Taáala tatumu-tumulo boito, lolao mai ola-U wau Wau olo tumumulo monto Allahu Taáala. Odito olo taa u molamelo tapu-U matumumulo monto ola-U. **58** Uti-utieelo roti u lotuhutai lonto sologa; diila debo odelo roti u pilolameli nenemoyamu. Sababu tou malo lamelo roti boito, timongolio debo yilate olo. Bo taa u molamelo roti botie matumumulo ohiheo-hiheolo maó." **59** Ngoáamilalo boito pilotahuda li Isa tou Tio helo ngaajali tobele potabiaalo to Kapernaum. **60** Tou loódungohe tataa-heyaalo li Isa boito, dadaata towolota lo tahiduduá o-Lio lolojiya maó, "Pongaajali botie mailaba buheetio. Tatoonu tamowali mololimo maó!" **61** Ti Isa lohihilao motota deü tahiduduá o-Lio hiwingoa pasali losuáli boito. Yi Tio malo tahuda, "Wolo timongoli diila sanangi sababu tataa-heyaalo boito? **62** Woloolo mola waliilio dewonu timongoli moóonto Walaó Manusia muli mobotula mola ode tambati-Lio u bohulio? **63** Tamohutu mai manusia tumumulo yito

Rohullah. Olootolo manusia diaaluo hunalio. Tataa-heyaalo upilo tahuda-U mai olemu botie tataa-heyaalo Rohullah wau tataa-heyaalo u mongohi tutumulo. **64** Bo debo woluo olo towolota limongoli tadiila mohuto palacaya." (Mailotaawa li Isa tou bohulio mai titatita tadiila mohuto palacaya, wau tatoonu tamamo hiyanati o-Lio.) **65** Lapatao ti Isa luli lotahuda maó, "Uitolo sababuulio Wau mopoótaa mai olemu deu diaaluo penu boli ngotaa maó tamowali monaó mai ode ola-U, wonu ti Paapa-U diila mongohi olio." **66** Tumulalo mai tosaaati boito dadaata tahiduduá o-Lio, lololaa maó o-Lio, wau diilalo mohuto moduduá o-Lio. **67** Lapatao ti Isa lohintu maó to tamo pulaa duulota tahiduduá o-Lio, "Wolo timongoli olo mohuto mololaa maó ola-U?" **68** "Eeya," ualei Simon Petrus o-Lio, "ode tatoonu mongowatotia musi monaó? Tahuda lo Eeya mongohi tutumulo ututuulio tutu wau ohiheo-hiheolo maó. **69** Mongo watotia mapila-lacaya wau yakini deu Eeyaalo utolia tamantali lonto Allahu Taaala." **70** Ti Isa lolametao, "Wolo diila maa Wau talo lulaotao olimongoli tamo pulaa duulota botie? Bo ngota towolota limongoli yito lati!" **71** Tapilatuju li Isa yito tei Yudas walaée Simon Iskariot. Sababu eleponu tei Yudas ngotaalio lo tamo pulaa duulota muri li Isa, tio mammo hiyanati li Isa.

**7:1** Lapatao uito ti Isa malonaó ode utoonulalo maó to Galilea. Tio diila lohuto ode madala lo Yudea sababu tahidihima kawasa lo Yahudi mola teto o makusudu momate olio mate-mateelo maó. **2** Towakutu boito malembidei Dulahu Buka Wombohe Duungo. **3** Yi mongo wutati Isa loloiya maó o-Lio, "Tolailo maó tambati botie wau ponaólo ode Yudea, alihu tahiduduá ole-Mu mowali momilohe olo kalajaa-Mu. **4** Diaaluo taa u mamoluoó wolo u pohutuolio, wonu tio motohilaa mowali otaawa lotaa dadaata. Wonu Yio mohutu susuu-aliyaalo debo odelo uito ngoilanggubu dunia musi motota!" ( **5** Sababu mongo wuta-Tio lohihilao olo diila palacaya o-Lio). **6** "Diipo wakutuulio ola-U," tahuda maó li Isa ode limongolio, "bo ode limongoli timiidu wakutu mowali. **7** Dunia botie diila pongalo aakali molonui mongoli. Bo Wau memangi lonuo lodunia, sababu Wau laito hemo tahuda ode dunia deu huhutuulio moleeto. **8** Ponaólo

timongoli lohihilao ode lameyangi boito. Wau diila monao sababu diipo wakutuulio ola-U." **9** Oditolo tahuda li Isa ode mongo wuta-Tio, wau Tio olo malo tibiluloa to Galilea. **10** Lapatao mongo wuta-Tio lonaó ode lameyangi boito, wolo poó-poóoyo ti Isa malonaó lohihilao lou diila ilotaawa lotau. **11** Ngotilonggadu lameyangi boito, tahidihima kawasa lo Yahudi hemo lolohe o-Lio wau hemohintu-hintu, "Toutoonu Tio?" **12** Dadaata tau mahipo loloohuma tomimbihu o-Lio. Woluo talo loiya, "Tio taa mopiohu." Waluo poli talo loiya, "Diila! Tio hemo polapalo totaa dadaata." **13** Bo diaaluo penu boli ngotaa maó tabuheli mobisala juujulu tomimbihu o-Lio sababu timongolio moohe to tahidihima kawasa lo Yahudi. **14** Tohuungo lo lameyangi, ti Isa tilumuwoto ode delomo Bele lo Eeya, tulusi lolumulaó longajali. **15** Tahidihima kawasa lo Yahudi lolinggolabe daa wau loloiya, "Woloolo mola tau botie malotota odito daatalio, lebe-lebe pomaó Tio diipo peenta maó helo sikola?" **16** Ti Isa lolametaó, "U pilongajali-U botie diila ajalani-U, bo ajalani-Lio lo talolao mai ola-U. **17** Taa u mohuto moduduó u otohilaa lo Allahu Taála, mamotota maó wolo pongajali-U boito dudunggalio mai monto Allahu Taála meaambo monto ola-U lohihilao. **18** Taa u mongohi ajalanilio lohihilao mololohe ohulumati ode batangalio lohihilao. Bo taa u mololohe ohulumati ode o-Lio tailaolio mai, tau boito juujulu, diaaluo wimbulo to olio. **19** Diila tei Musa tamaa longohi mai papaa-lentawalo Allahu Taála ode olemu? Bo towolota limongoli diaaluo maó talo duduá papaa-lentawalo boito. Yilongola timongoli ohilaa momate ola-U mate-mateelo maó?" **20** Taa dadaata boito lolametaó, "Yio biyongo! Tatoonu taohilaa momate ole-Mu mate-mateelo maó?" **21** Ti Isa lolametaó, "Bo wambaó tuwau kalaja pilohutu-U todulahu Saabati, wau timongoli lolinggolabu. **22** Tei Musa longohi mai olimongoli wuudu u polunaalo -- eleponu sunati boito otutuulio maó asaliilio mai diila lonto olei Musa bo lonto mongo tiyamo loluuhuru tou dipolulio mai tei Musa. Sababu uito, penu boli todulahu Saabati timongoli ohilaa moluuna tau. **23** Wonu timongoli mohutu uito alihu diila maó molambanga wuudu lei Musa pasali lou sunati, yilongola timongoli moingo ola-U, sababu lopoóluli ngangaa-waalo maó batanga lotau todulahu Saabati? **24** Diila maó pomutoó tau bo dadaasari

tou oontonga, bo dadaasari tou aadili." **25** Lapatao woluo dengolo lota taulo Yerusalemu loloiya, "Diila maa Tio botie tau-Lio tahe lolohulo u pateelo mate-mateelo maó? **26** Bilohi maó Tio hemobisala lou bebase totalu lotaa dadaata, wau diaaluo tamoloiya wolo-wolo to o-Lio! Wolo tahidihima kawasa to olanto botie tanu malotota loutau deu Tio botie Olongia Tamoo-poahua? **27** Bo wonu Olongia Tamoo-poahua boito meidungga mai diaaluo penu boli ngotaa maó tamotota monto utoonu asalii-Lio! Lebe-lebe pomaó otaawanto lonto utoonu asalii-Lio lotau botie." **28** Lapatao, tou ti Isa donggo hemo ngaajali todelomo Bele lo Eeya, Tio longibode mola wolo suala daa, "Oditolio otaawa limongoli tatoonu Wau botie, wau lonto utoonu asalii-U? Wau diila leidungga mai sababu othilaa-U lohihilao. Wau yilao-Lio mai lo taohaku lolao mai ola-U, wau Tio mowali palacayalo. Bo timongoli diila moonuhe o-Lio. **29** Wau moonuhe o-Lio, sababu Wau asaliilio mai lonto o-Lio, wau Tiolo talolao mai ola-U." **30** Tou boito timongolio ohilaa moheupa li Isa, bo diaaluo tabuheli modihu o-Lio, sababu diipo leidungga wakutuulio. **31** Dadaata towolota lotau-tauwalo boito mapilacaya o-Lio, wau hemoloiya, "Wonu Olongia Tamoo-poahua boito meidungga mai, wolo Tio mowali mohutu lebe dadaata maó u moolinggolabe wolo tau botie?" **32** Tau-tauwalo Parisi loodungohe woloolo mola taa dadaata boito hipo lolohuma pasali li Isa. Sababu uito peé-peéenta wolo mongo iimamu tauwa, timongolio malo poahu dengolo lota tamoo-kawalia Bele lo Eeya loheupa li Isa. **33** Ti Isa lotahuda maó totaa dadaata boito todelomo Bele lo Eeya, "Bo ngopeé mola wambaó Wau donggo peé-peéenta woli mongoli. Lapatao uito Wau mamuli mohualinga mola ode talolao mai ola-U. **34** Timongoli mamu lolohé ola-U, bo diila moodungga ola-U; sababu timongoli diila moonaó mai ode tambati toutoonu Wau woluo." **35** Lapatao tahidihima kawasa lo Yahudi malo loiya ngota timongota "Tau botie ohilaa monaó ode utoonu tilinggula ito diilalo moodungga o-Lio? Wolo Tio ohilaa monaó ode tau-tauwalo Yahudi tahi biluloaawa to bulemengo lipu towolota taulo Yunani, wau mongaajali taulo Yunani? **36** Wolo makusudu-Lio wolo lotahuda deu ito mamolohé o-Lio bo diila moodungga o-Lio wau deu ito diila moonaó mai ode tambati toutoonu Tio

woluo?" **37** Topulito dulahu lo lameyangi boito, deüito-yito dulahu ulaba-labaalo polohuna daa, ti Isa tilimihulaó todelomo Bele lo Eeya tulusi longiibode, "Taa u mototoango ponaólo mai ode ola-U mai mongilu. **38** Tomimbihu taa upalacaya to ola-U, tulatulade todelomo Kitabi, 'Monto delomo hilaalio tumolohei totoo-lohuwaalo taluhu u mongohi tutumulo.' " (**39** Ti Isa lotahuda pasali lo Rohullah, u matolimo lotau-tauwalo tapalacaya o-Lio. Sababu tou boito Rohullah diipo yilohi-Lio mai; sababu ti Isa diipo pilolaió wolo opopate-Lio.) **40** Dadaata taa loódungohu wolo upilo tahuda li Isa, wau towolota limongolio woluo talo loiya, "Tau botie maatantu Nabi boito!" **41** Tawewo lolojiya, "Utieelo Olongia Tamoo-poáahua!" Bo woluo olo talo loiya, "Aa, diila pongalo aakali Olongia Tamoo-poáahua dudunggaalio mai lonto Galilea? **42** Todelomo Kitabi tulatuladu deü Olongia Tamoo-poáahua yito wali mai lei Dauda wau mamei dungga monto Betlehemu, deüito-yito kambungu pilohuluta loduhu lei Dauda." **43** Pulitio maó tau-tauwalo mahipo hahaamawa tomimbihu li Isa. **44** Woluo taóhilaa moheüpa o-Lio, bo diaaluo penu boli ngotaa maó tamodihu o-Lio. **45** Tou tahi pokawalia Bele lo Eeya taa ilahulalio mota loheüpa li Isa luli lohualingai, mongo iimamu tauwa wau tau-tauwalo Parisi boito lohintu maó olimongolio, "Yilongola timongoli diila lodelo mai o-Lio odia?" **46** Tahi pokawalia boito lolametaó, "Waa, diipo peéenta maó woluo tahelo bisala debo odelo Tio!" **47** "Wolo timongoli olo mapilo lapalo-Lio?" ualo tau-tauwalo Parisi boito. **48** "Wolo woluo tahidihima kawasa lonto olanto meambo taulo Parisi tapalacaya o-Lio? **49** Bo taa dadaata botie, diila otaawa limongolio butoée Musa, wau penu boli woloolo mola olo timongolio malaá-laánati." **50** Tala ngota towolota lotau-tauwalo Parisi boito yito tei Nikodemus tamaa peéenta lonaó mai odeli Isa. Tei Nikodemus lolojiya maó ode tau-tauwalo Parisi wewo, **51** "Moduduá butoó, tahingota-ngotaawa diila mowali hukuu-maniyola tou palakalalio diipo dilungohe wau huhutuulio pilalakisa." **52** "Wolo yio olo lonto Galilea?" tametaó limongolio, "Palakisai maó Kitabi! Yio mamooonto deü diaaluo nabi taásaliilio mai lonto Galilea!" **53** Lapataó uito, ngoáamila tau malo hualinga ode bele.

**8:1** Boti Isa lonaó mola ode Huludu Jaitun. **2** Loloombulio mola dimodupo Tio lonaó mota poli ode Bele lo Eeya, wau dadaata tahe lonaó mai ode o-Lio. Ti Isa malo tihuloáa mola, tulusi lolumulo longaaajali maó olimongolio. **3** Touí boito, guguu-ruwaalo agama wau tau-tauwalo Parisi lodelo mai ode o-Lio taabua ngota tailo dungga hemojina. Timongolio lopoáhu taabua boito tilimihulo tohuungio, **4** lapataó loloiya maó odeli Isa, "Paaá Guru, taabua botie ilodungga lamiaatia donggo hemojina. **5** Todelomo butoée Musa woluo wuudu deü taabua debo odelo utie paatuti paiyola lobotu tunggula mate. Botia woloolo mola huhama li Paaá?" **6** Timongolio lohintu odito u mohentobe o-Lio, alihu timongolio mowali mopotala o-Lio. Boti Isa wambaó dungudungu, wau hemo lulade tohuta wolo tingoonga lo uluu-Lio. **7** Touí timongolio tulusi hemo huntula o-Lio, yi Tio malo mintaaí lunggo-Ngio wau lotahuda maó olimongolio, "Taa udiila odusa towolota limongoli, hulialo maó tio tamomai lobotu ode taabua boito." **8** Lapataó uito ti Isa luli lotidungu mola wau luli lolulade tohuta. **9** Lapataó loódungohe li Isa lotahuda odito, malo tinaónaó timongolio lololaa maó tambati boito, ngota-ngota tumulalo mai tahulangio. Pulitio maó bolo ti Isa tutuuwau taleitolaa teto wolo taabua tadonggo tihutihula totambati boito. **10** Lapataó ti Isa malo mintaaí mola lunggo-Ngio wau lotahuda maó ode taabua boito, "Touítoonu timongolio ngoáamila? Diaaluo talo hukuumani olemu?" **11** "Diaaluo, Paaá," tametio maó. "Ooo," uali Isa, "Wauí olo diila mohukuumani mai olemu. Botia ponaólo, diilalo pohutu dusa." **12** Ti Isa luli lotahuda totaa dadaata, tahuda-Lio maó, "Wauílo tilango dunia. Taa u moduduó ola-U diila tamonaó touí modiólomo, bo o tilango tutumulo." **13** "Botia Yió longohi sakusi pasali lo batanga-Mu lohihilao," ualo tau-tauwalo Parisi boito to o-Lio, "Sakusi-Mu boito diila otutu." **14** Ti Isa lolametaó, "Eleponu Wauí mongohi mai sakusi pasali lo batanga-U lohihilao, sakusi-U boito otutu; sababu otaawa-U lonto utoonu mai dudungгаа-U wau ode utoonu nonaóo-U. Diila otaawa limongoli lonto utoonu mai dudungгаа-U, wau ode utoonu nonaóo-U. **15** Timongoli momutoó tau wolo dudelo lomanusia; Wauí diila momutoó penu boli ngotaa maó. **16** Bo humayaalio Wauí momutoó tau, putuusani-U boito aadili, sababu Wauí diila tutuuwau; Allahu

Taála talolao mai ola-U woluo wola-U. **17** Todelomo butoée Musa tulatuladu odie; ososakusi u otutu yito ososakusi monto taduulota. **18** Tamongohi sakusi pasali lo batanga-U woluo duulota Wau wau ti Paapa-U talolao mai ola-U." **19** "Ti Paapa-Mu boito toutoonu?" loiya maó limongolio. Ti Isa lolametaó, "Timongoli diila moónuhe ola-U meaambo li Paapa-U. Humayaalio timongoli olo moónuhe ola-U, maatantu timongoli moónuhe li Paapa-U." **20** Ngoáamilalo botie pilotahuda li Isa tou Tio donggo hemo ngaajali to Bele lo Eeya totili bubuu-luwaalo lodoi podewo. Bo diaaluo penu boli ngotaa maó talo heupa o-Lio, sababu diipo leidungga wakutuulio. **21** Ti Isa luli lotahuda maó ode limongolio, "Wau mamonaó wau timongoli mamu lolohe ola-U, bo timongoli maamate todelomo dusamu. Ode tambati ponaówa-U, diila mowali onaówa limongoli." **22** Yi tahidihima kawasa lo Yahudi malo loiya, "Tanu Tio motohilaa motitipate, sababu tio malo tahuda, 'Ode tambati ponaówa-U, diila mowali onaówa limongoli.'" **23** Lapataó ti Isa lotahuda maó ode limongolio, "Timongoli dungga-dungga mai lonto walungo; bo Wau dungga-dungga mai lonto yitaato. Timongoli lonto dunia; Wau diila lonto dunia. **24** Uito sababuulio Wau motahuda mai olemu, deu timongoli maamate todelomo duduu-saamu. Wau memangi timongoli maamate todelomo duduu-saamu, wonu diila palacaya deu, 'Wau lo Tio tailunte WAU WOLUO'." **25** "Otutuulio maó tatoonu Yio?" yilintu maó limongolio. Ti Isa lolametaó, "Donggo pongoola muli mobisala woli mongoli! **26** Donggo dadaata suáli tomimbihu olimongoli u ohilaa potahuda-U mai wau pomutoálo. Bo Tio talolao mai ola-U mowali palacayalo. Wau Wau mopoótaa ode dunia wolo u ilodungohe-U lonto o-Lio." **27** Timongolio diila mongalati deu Tio donggo hemo bisala toli mongolio pasali li Paapa. **28** Sababu uito ti Isa lotahuda maó olimongolio, "De wonu timongoli malo palaió mola Walaó Manusia, timongoli mamotota deu 'Wau lo Tio tailunte WAU WOLUO', wau timongoli mamotota deu diaaluo penu boli tuwau maó u pilohutu-U monto batanga-U lohihilao. Wau bo wambaó motahuda wolo upilo ngaajali mai li Paapa ola-U. **29** Wau Tio tamalolao mai ola-U woluo wola-U. Diila peéenta maó Tio mopoluli ola-U tutuwau, sababu Wau laito hemohutu wolo umoó

sanangi hilaa-Lio." **30** Lapatio maó ti Isa lotahuda u ngoáamilalo boito, dadaata taa palacaya o-Lio. **31** Lapataó ti Isa lotahuda totau-tauwalo Yahudi tamaa pilalacaya o-Lio, "Wonu timongoli tumumulo moduduá pongaajali-U otu-otutuulio maó muri-U, **32** yi maóonuhe limongoli Allahu Taáala taótutu, wau masababu uito timongoli malopatolo!" **33** "Amiaatia botie wali mai lei Abraham," uali mongolio. "Diipo peéetna maó amiaatia lowali wato penu boli lo tatoonu! Wolo makusudu-Mu wolo tahuda, "Timongoli malopatolo?" **34** "Otutu banali tahuda-U botie," tahuda maó li Isa ode limongolio. "Taa u mohutu dusa, taboitolo wato lodusa. **35** Wau wato ngota diila otambati utatapu todelomo ungaalaa, hiambola walaó u ohiheo-hiheolo maó otambati todelomo ungaalaa. **36** Sababu uitolo, wonu Walaó mopo lopotai olimongoli, timongoli otu-otutuulio maó molopato. **37** Memangi otaawa-U timongoli botie wali mai lei Abraham. Bo timongoli motohilaa momate ola-U mate-mateelo maó, sababu timongoli diila mohuto mololimo pongaajali-U. **38** Wolo u iloontonga-U toli Paapa-U, uitolo olo upilo tahuda-U mai. Hiambola timongoli mohutu wolo u pilo ngaajali lipaapamu olemu." **39** Timongolio lolametaó, "Ti Paapa lamiaatia deuito-yito tei Abraham." "Humayaalio timongoli tióotutua walaée Abraham," tahuda Isa, "tantuulo maó timongoli mohutu wolo u pilohutu lei Abraham. **40** Wau mopo tunggulai olemu obobanali u ilodungohe-U lonto Allahu Taáala, bo timongoli ohilaa momate ola-U mate-mateelo maó. Tei Abraham diila lohutu debo odelo uito! **41** Timongoli helohutu wolo upilohutu lipaapamu lohihilao." Tametaó limongolio, "Amiaatia diila mongo walaó haramu. Ti Paapa lamiaatia bo ngota, deuito-yito Allahu Taáala lohihilao." **42** Lapataó ti Isa lotahuda ode limongolio, "Humayaalio Allahu Taáala boito ti Paapamu, timongoli mamó tolianga ola-U, sababu Wau dungga-dungga mai lonto Allahu Taáala. Wau dungga-dungga mai diila wolo hilaa-U lohihilao, bo Tiolo tamalolao mai ola-U. **43** Wolo sababuulio timongoli diila mongalati wolo upilo tahuda-U? Sababu timongoli diila moó tahangi modungohe pongaajali-U. **44** Ibilisi wambaó ti paapamu, wau timongoli mohuto moduduá u otohilaa lipaapamu. Tumulalo mai bohulio ibilisi boito moomatea mate-mateelo maó. Tio diila peéenta maó motiwambaó ode u otutu, sababu diaaluo u otutu to olio.



Wonu tio mohimbulo, uito mawaajibu, sababu maödito piiliilio. Tio mohimbuloa wau bungo lou totoonulalo yimbulo. **45** Bo Wau motahuda mai u otutu, wau sababu uitolo timongoli diila palacaya ola-U. **46** Tatoonu towolota limongoli mowali mongohi bukuti deu Wau odusa? Wonu Wau motahuda mai u otutu, yilongola timongoli diila palacaya ola-U? **47** Taa asaliilio mai monto Allahu Taála, modungohe tahuda lo Allahu Taála. Bo timongoli diila lonto Allahu Taála, uitolo sababuulio timongoli diila mohuto modungohu." **48** Tau-tauwalo Yahudi boito lolametao li Isa, "Wolo diila otutu loiya lami botie deu Yio taulo Samaria tailo tuanga lolati?" **49** Ti Isa lolametao, "Wau diila ilotuanga lolati. Wau hemo hulumati li Paapa-U, bo timongoli lohina ola-U. **50** Wau diila hemo lolohe hulumati ode batanga-U lohihilao. Woluo ngota tahemo tolopani mai ohulumati ode ola-U, wau Tiolo tamo mutoai. **51** Otutu banali tahuda-U botie, taa u moduduó tahuda-U, ohiheo-hiheolo maó diila tamaate." **52** Lapatao tau-tauwalo Yahudi boito loloiya maó odeli Isa, "Botia mailotaawa lami deu yio botie otu-otutuulo maó ilotuanga lolati! Tei Abraham lohihilao mailate, odito olo ngoamila nabi. Bo Yio malo tahuda, 'Taa u moduduá tahuda-Mu, ohiheo-hiheolo maó diila tamaate.' **53** Wonu tei Abraham lohihilao mailate, wau mongo nabi ngoamilalo olo mailate, Yio botie tatoonu? Diila pongalo aakali Yio talebe udaá woli paapa lami tei Abraham!" **54** Ti Isa lolametao, "Humayaalio Wau mololohe ohulumati ode batanga-U lohihilao, ohulumati boito diaaluo hunalio. Tamo hulumati ola-U yito ti Paapa-U tahe anggapuo limongoli Allahu Taála limongoli, **55** lebe-lebe pomaó timongoli diila moónuhe o-Lio. Bo Wau moónuhe o-Lio. Humayaalio Wau motahuda mai deu Wau diila moónuhe o-Lio, yi Wau ngotaalio lo tamoo-himbulowa, tutuwauwa debo odelo timongoli. Wau moónuhe o-Lio wau modungohe tahudaa-Lio. **56** Ti Paapamu Abraham sanangi daá deu tio mamooonto dulahu-U. Tio maloonto wau tio sanangi!" **57** Lapatao tau-tauwalo Yahudi loloiya maó odeli Isa, "Umulu-Mu diipo limo lopulu lotaunu, wau Yio maloonto olei Abraham?" **58** Ti Isa lolametao, "Otutu Wau motahuda mai olemu: tou tei Abraham diipo pilotutulio mai, Wau mawoluo." **59** Lapatao tau-tauwalo Yahudi boito lohama botu u pomailio o-Lio; boti Isa loluo batanga-Lio,

tulusi lonaó lololaa maó Bele lo Eeya.

**9:1** Tou ti Isa naónaó, iloontonga-Lio taa pitoó anggadu pilotutulio mai. **2** Tahiduduá li Isa lohintu maó odeli Isa, "Paaá Guru, yilongola tau botie pilotutulio mai pitoó? Wolo kalana tio lohihilao odusa meaalo mongo dulaálio taódusa?" **3** Ti Isa lolametaó, "Tio pitoó diila sababu dusalio lohihilao meaalo dusa lomongo dulaálio, bo alihu tau mowali moóonto maó okokawasa lo Allahu Taáala mokalaja todelomo batangalio. **4** Ngotilonggadu donggo dulahu, ito musi mokalaja maó kalajaa-Lio lo talolao mai ola-U. Hui mamei dungga, wau penu boli ngotaa maó diila tamowali mokalaja. **5** Ngotilonggadu Wau todunia botie, Waulo tinelyo dunia." **6** Lapataó lotahuda odito ti Isa lonula loiyohu ode huta, wau longaaheó yiyoo-Hio boito wolo huta. Lapataó piloseka-Lio tomato lotau boito, tulusi lotahuda maó olio, **7** "Ponaólo pobelesia maó bayamu to Kulamu Siloam." (Siloam boliilio 'Ilutolia'.) Yi tau boito malonaó wau lopobelesi bayalio. Tou tio lohualingai, tio malowali loóonto. **8** Mongo tiheedio wau tau-tauwalo tou dipolulio mai loóonto olio hemohile-hile, ngoáamilalo malo loiya, "Diila bo maatio botie tabiasaalio hulohuloáa hemohile-hile?" **9** Woluo talo loiya, "Memangi maatio." Bo woluo olo talo loiya, "Diila, tio bo ngopeéé motutuuwau wolo tau boito." Bo tau boito lohihilao loloiya, "Wawaatiaalo tio." **10** "Wooloo mola waliilio tunggula yio malowali loóonto?" uali mongolio olio. **11** Tio lolametaó, "Taa ilunte Isa boito lohutu maó lataó ngoidi tulusi piloseka-Lio mai tomato lowatia wau lotahuda, 'Ponaólo pobelesia maó bayamu to Kulamu Siloam.' Tulusi watia lonaó. Wau tou watia hemo pobelesi baya lowatia, watia malowali loóonto." **12** "Tou toonu tau boito?" yilintu maó limongolio. Tio lolametaó, "Diila otaawa." **13** Todulahu boito dulahu Saabati tou ti Isa longaaheó huta wolo yiyoo-Hio u lohutu taa pitoó boito lowali loóonto. Yi taa engontielio pitoó boito dilelolio mota ode tau-tauwalo Parisi. **15** Timongolio olo lohintu maó olio wooloo mola tio malowali loóonto. Tio lolametaó, "Tio malodutu mai lataó tomato lowatia, lapataó pilobelesi maó lowatia lataó boito watia malowali loóonto." **16** Dengolo lota towolota tau-tauwalo Parisi boito loloiya, "Diila pongalo aakali taa ulohutu utie

asaliilio mai lonto Allahu Taáala, sababu Tio diila momandungi dulahu Saabati." Bo taa wewo loloiya, "Diila pongalo aakali taa odusa mohutu momoo'-linggolabeyalo debo odelo utie?" Lapatao tilumoodulo mola huhama u hihihede towolota limongolio. **17** Yi tau-tauwalo Parisi boito luli lohintu maó totau boito, "Wolo huhamaamu pasalii-Lio lo talohutu mai olemu loóonto?" "Tio nabi." tametao lotau boito. **18** Bo mongo tauwa lo Yahudi boito diila lohuto palacaya deu tau boito memangi pitoo tou dipolulio mai wau botia malowali loóonto. Sababu uito timongolio malo tianga mongo dulaálio, **19** wau lohintu maó, "Otutu tio botie walaumu tahe loiyamu pilotutulio mai pitoo? Woloolo mola tio malowali loóonto botia?" **20** Mongo dulaá lotau boito lolametao, "Memangi tio botie walaó lamiaatia; wau tio memangi pitoo anggadu pilotutulio mai. **21** Bo woloolo mola tio malowali loóonto botia, diila otaawa lamiaatia. Wau tatoonu talohutu olio malowali loóonto, uito olo diila otaawa lamiaatia. Yintuwalo olio, tio maleidaa; tio mowali molameto lohihilao." **22** Mongo dulaá lotau boito loloiya maó odito sababu timongolio moohe tomongo tauwa lo Yahudi; sababu timongolio boito malo heeluma, deu tamo tolongaku maó li Isa debo odelo Olongia Tamoo-poáhua, diilalo mowali tumuwoto ode bele potabiaalo. **23** Uito sababuulio mongo dulaá lotau boito loloiya maó, "Tio maleidaa; yintuwalo olio." **24** Lapatao timongolio luli lotiango taa u engontielio pitoo boito, wau loloiya maó olio, "Potadiaalo mola deu yio mamoloiya mai u otutu. Otaawa lami tau boito taa odusa." **25** "Wolo tio odusa meaalo diila," tametao lotau boito, "diila otaawa lowatia. Bo tuwau suáli u otaawa lowatia; muloololio mai watia pitoo, botia watia maloóonto." **26** Lapatao timongolio luli loloiya maó olio, "Mawolo u pilohutu-Lio olemu? Woloolo mola Tio lohutu olemu lowali loóonto?" **27** Tau boito lolametao, "Mailungguli mai lowatia olimongoli bo timongoli diila mohuto modungohu. Yilongola timongoli ohilaa modungohe poli? Otanu timongoli ohilaa mowali muri-Lio olo?" **28** Lapatao timongolio malomuayo olio wau loloiya maó, "Yio-yioolo muri-Lio; ami diila! Ami muri lei Musa. **29** Otaawa lami deu Allahu Taáala malo tahuda odelei Musa. Bo pasali lotau boito, diila otaawa lami lonto utoonu asalii-Lio." **30** Tau boito lolametao, "Moólinggolabe daa deu diila otaawa limongoli lonto

utoonu asalii-Lio, hiambola Tio malohutu olaatia lowali loóonto. **31** Otaawanto deu Allahu Taaala diila modungohe taa odusa, bo taa u mohulumati Allahu Taaala, wau tamohutu kahandaki-Lio. **32** Tumulalo mai bohulo dunia diipo peéeta maó ilodungohe woluo talohutu tau pilotutulio mai pitoó malowali loóonto. **33** Wonu tau boito diila monto Allahu Taaala, tio diila mowali mohutu wolo-wolo." **34** Tametaó limongolio, "Wolo? Yio tapolu-polu lodusa anggadu pilotutulio mai, yio mamó ngaajali olami?" Yi tumulalo mai tou boito tio dilinilio tumuwoto ode bele potabiaalo. **35** Ti Isa loódungohe deu tau boito mailinggi limongolio lonto bele potabiaalo. Tio malo lolohe tau boito lapataó lotahuda olio, "Wolo yio palacaya to Walaó Manusia?" **36** Tau boito lolametaó, "Tatoonu Tio. Tuani? Tulungia poótaa mai alihu watia palacaya o-Lio." **37** "Yio maloóonto o-Lio," tametaó li Isa. "Tiolo tamasaatia botie donggo hemobisala wolemu." **38** "Watotia, palacaya, Eeya," loiya maó lotau boito, lapataó losujudu mola tio totalu li Isa. **39** Ti Isa lotahuda maó, "Wau dungga-dungga mai ode dunia botie mai momutoó; alihu taa pitoó mowali moóonto, wau taa moóonto, mowali pitoó." **40** Dengolo lota taulo Parisi tawoluo teto loódungohe li Isa lotahuda odito, tulusi timongolio lohintu o-Lio, "Makusudu-Mu ami botie pitoó olo?" **41** Ti Isa lolametaó, "Humayaalio timongoli pitoó, timongoli diila odusa. Bo sababu timongoli malo loiya, 'Ami moóonto,' uito boliilio maó timongoli donggo odusa."

**10:1** "Otutu banari tahudaa-U botie: Taa tumuwoto ode delomo lantunga lohimba moli bala, wau diila moli huhebu, bo momiaata moli dalalo wewo, tau boito mototaówa wau tamoo-lambata. **2** Bo taa tumuwoto moli huhebu, tio-tiolo diti lohimba. **3** Tamoodahawa lantunga momuó maó huhebu to olio, wau hihii-mbawaalo mamó dudua súalaalio tou tio motiango timiidu tanggulo hihii-mbawaalo boito wau modelo hihii-mbawaalo ode bulemengio. **4** Lapataó hihii-mbawaalo boito dilelolio ode bulemengio, diti boito monaó totalu, wau hihii-mbawaalo boito modudua olio sababu hihii-mbawaalo moóonuhe súalaalio. **5** Hihii-mbawaalo diila tamohuto modudua taawewo, tumbaó matumateó monto tau boito, sababu diila moóonuhe súalaalio." **6** Ti Isa lohungguli maó pohumaya boito, bo

timongolio diila mongalati wolo u milakusudu-Lio. **7** Yi ti Isa peéntapo lotahuda maó, "Otutu banali tahudaa-U botie: Waulo huhebu duólo himba. **8** Ngoáamila tamonaó mai tou dipolulio Wau deúito-yito tamootaówa wau tamoo-lambata, bo hihii-mbawaalo diila modungohe suala limongolio. **9** Waulo huhebu. Tatoonu tatumuwoto moli ola-U mamoaáhu; tio tumuwoto lumualo wau moótapu uáalo. **10** Tamootaówa monaó mai bo mai motaó, mai momate mate-mateelo maó wau mai mongantulu. Bo Wau dungga-dungga mai alihu manusia moótapu tutumulo -- tutumulo laba-labaalo daata. **11** Waulo diti tamopiohu. Diti tamopiohu mongohi nyawalio ode hihii-mbalio. **12** Tahe wuupalio tadiila diti wau diila olo taa ohuuwo lo hihii-mbawaalo boito, matumeteó mololaa maó hihii-mbawaalo wonu tio moóonto soligala monaó mai. Yi hihii-mbawaalo boito madangapolio wau pobubuu-alaalio lo sorigala. **13** Tahe wuupalio boito tumetaó, sababu tio mokalaja duólo wuupa. Tio diila momandungi hihii-mbawaalo boito. **14** Waulo diti tamopiohu. Tutuuwauwa debo odelo ti Paapa moóonuhe ola-U wau Wau moóonuhe li Paapa, odito olo Wau moóonuhe hihii-mbaa-U wau hihii-mbaa-U olo moóonuhe ola-U. Wau mohudu nyawa-U ode limongolio. **16** Donggo woluo hihii-mbawaalo uwewo hakuu-U olo, bo diila waiwaito todelomo himbala lohimba botie. Timongolio olo musi deloo-U wau timongolio mamoo dungohe sualaa-U. Timongolio ngoáamilalo mamowali ngopo himbala wolo ngota ditilio. **17** Ti Paapa lomonu ola-U sababu Wau lohudu nyawa-U, u muli tolimoolo poli. **18** Diaaluo penu boli ngotaa tamowali mohama maó monto ola-U. Wau mohudu maó moduduá otohilaa lohihilao. Wau okawasa u mohudu maó, wau okawasa muli mohama maó. Ui-uitolo tuugasi u tilolimo-U lonto li Paapa-U." **19** Sababu ti Isa lotahuda odito, yi tau-tauwalo Yahudi mahipo hahaamawa. **20** Dadaata tahi poloiyawa, "Tio mailo tuanga lolati! Tio biyongo! Pongoola timongoli modungohe o-Lio?" **21** Bo woluo olo tahe molojiya, "Taa u ilotuanga lolati diila hemobisala odito! Wolo lati mowali mohutu taa pitoó mowali moóonto?" **22** To Yerusalemu tau-tauwalo donggo hemo polame dulahu Buka Pongo-saahalo Bele lo Eeya. Tou boito sembo lohuhulo. **23** Ti Isa donggo naónaó to Sulambe Salomo todelomo Bele lo Eeya, **24** tou tau-tauwalo Yahudi lonaó mai lotiambu topalito li Isa.

Timongolio malo loiya, "Tunggula omolua Yio ohilaa mopoluli olami diila otatapua lohilao? Poleleaalo mai wolo juujulu, wonu Yio otu-otutuulo maó Olongia Tamoo-poáahua." **25** Ti Isa lolametaó, "Mapilo tahuda-U mai olimongoli, bo timongoli diila palacaya. Ngoáamila kalaja u pilohutu-U to tangguli Paapa-U, mongohi mai bukuti pasalii-U. **26** Timongoli diila palacaya sababu timongoli diila waiwaito to hihii-mbaa-U. **27** Hihii-mbaa-U modungohe sualaa-U. Otaawa-U timongolio, wau timongolio moduduá ola-U. **28** Wau mongohi mai olimongolio tutumulo ututuulio tutu wau ohiheo-hiheolo maó, wau u ohiheo-hiheolo maó timongolio diila tabinasa. Diaaluo penu boli ngotaa maó tamowali molambata olimongolio monto ola-U. **29** Ti Paapa-U tamalohudu mai olimongolio ode ola-U, mongilabotaó lou totoonulalo maó. Wau diaaluo penu boli ngotaa maó tamowali molambata olimongolio monto uluu li Paapa-U. **30** Wau wau ti Paapa-U yito tuwau." **31** Lapataó tau-tauwalo Yahudi luli lohama botu u pomailio li Isa. **32** Boti Isa lotahuda maó olimongolio, "Timongoli maloóonto ola-U helohutu dadaata kalaja umopiohu, uiludu mai li Paapa ola-U. Monto ngoáamila kalaja boito, toonu umoó sababu olimongoli ohilaa momai ola-U?" **33** Tau-tauwalo Yahudi boito lolametaó, "Diila bo kalana ngoáamila kalaja-Mu u mopiohu boito ami ohilaa momai wolo botu ole-Mu, bo sababu Yio hemo muayo Allahu Taáala. Yio ngotaalio lomanusia, wau ohilaa mopowali batanga-Mu Allahu Taáala." **34** Lapataó ti Isa lolametaó, "Diila matodelomo Buku lo Butoumu leitulade: Allahu Taáala lotahuda mai, 'Timongoli yito ila'? **35** Otaawanto deu wolo u leitulade todelomo Kitabi pohupohutu u ohiheo-hiheolo maó. Oditolio, wonu Allahu Taáala mongunte mai 'ila' totaa hipo lolimoa tuhudaa-Lio, **36** yilongola timongoli helo loiya ola-U hemo muayo Allahu Taáala sababu Wau lotahuda Walaó Allahu Taáala? Lebe-lebe pomaó Wau tilulaoto Allahu Taáala wau yilao-Lio mai ode dunia. **37** Wonu Wau diila mohutu kalaja u pilomalentai lo Allahu Taáala, diila maó pomalacaya ola-U. **38** Bo sababu Wau helohutu maó uito, pomalacayalo tou wolo u pilohutu-U boito, eleponu timongoli diila mohuto palacaya ola-U. Lou odito otaawa maó limongoli wau mongalati deu Allahu Taáala debo tuwau wola-U, wau Wau debo tuwau wolo Allahu Taáala." **39** Timongolio luli lotolopani

moheupa li Isa, bo Tio loolahi lonto olimongolio. **40** Ti Isa luli lohualinga ode ngotuwali lo Dutula Yordan, totambati u muloololio mai hepopolihua lei Yahya, lapatao malo tibiluloa mola teto. **41** Dadaata tau lona o mai ode o-Lio. Timongolio malo loiya. "Tei Yahya diila helohutu momoo-linggolabeyalo, bo ngoaamila uiloiyaalio pasali lotau botie otutu." **42** Tulusi dadaata taa mola teto palacaya li Isa.

**11:1** Ngotaalio tailunte Lajarus bilu-biluloa to Betania pee-peeenta wolo wutatio ti Maria woli Marta. **2** Ti Maria yito taabua talo looheo yinulo moonu ode oati Isa, wau pilaidelio wolo huwoio. Tou wakutu tuwau tei Lajarus longongoto. **3** Mongo wutatio duulota lopohabari ma o odeli Isa, "Eeya, wutato mongowatotia tapilonua lo Eeya boito mongongoto." **4** Tou ti Isa laodungohe habari boito, Tio lotahuda ma o, "Ngongoto botie diila tamoo pate. Utie lotoduo mai alihu Allahu Taala poudaalo, wau alihu woleeto olo Wala o Allahu Taala poudaalo mola." **5** Ti Isa momonu oli Marta, Maria wolei Lajarus. **6** Bo tou ti Isa lootapu ma o habari deu tei Lajarus mongongoto, Tio sangaja lotibiluloa to tambati-Lio donggo duuhui mola. **7** Lapatao uito bolo Tio lotahuda ma o to tahidudua o-Lio, "Dulo ito mohualinga ode Yudea." **8** Timongolio lolametao, "Paa Guru, botiboti mola tau-tauwalo Yahudi ohilaa momai li Paa wolo botu wau botia ti Paa ohilaa poli mohualinga mola odito?" **9** "Wolo diila ilo-ilolaanga hiheolio mopulaa dulo jamu?" tahuda ma o li Isa. "Taa mona o tou dulahu, diila meiteduo sababu tio moonto baango dunia botie. **10** Bo taa mona o tou hui meiteduo, sababu diaaluo baango to olio." **11** Odi-oditolo tahuda li Isa. Lapatao Tio luli lotahuda ma o, "Sahabatinto tei Lajarus malei tuluhu, bo Wau maamota mopobongu olio." **12** Tahidudua li Isa loloiya ma o, "Eeya, wonu tei Lajarus tuutuluhu, de tio mamoluli mai." **13** Makusudu li Isa deu tei Lajarus mailate. Bo timongolio hemo lantobu deu makusudu li Isa yito tei Lajarus bo tuutuluhu biasa. **14** Sababu uito ti Isa lotahuda ma o ode limongolio wolo juujulu, "Tei Lajarus mailate. **15** Bo Wau sanangi olo deu Wau diaaluo mola teto, sababu lebe mopioheo olimongoli, alihu timongoli mo o palacaya. Duloolo ito mona o mota botia odelei Lajarus." **16** Tei Tomas tailunte "Taa Pingi" loloiya ma o ode mongo sahabatilio

tahiduduá li Isa, "Dulo ito moduduó, penu boli ito mate wo-Lio!" **17** Tou ti Isa leidungga mota ode tambati boito, tei Lajarus mawopahui hiheolio tokuubulu. **18** Betania membideó lo Yerusalemu, tanu tolo kilo lamingio. **19** Dadaata tau lo Yahudi malonaó mai lomilohe oli Marta woli Maria u lomalongo olimongolio sababu timongolio ilopatea lo wutatio. **20** Tou ti Marta loódungohe ti Isa lonaó mai, tio yilumualai lolutulo li Isa, hiambola ti Maria lotibiluloáa tobele. **21** Loiya maó li Marta odeli Isa, "Eeya, humayaalio Eeya woluo tea tou boito, tantu wutato lowatotia diila yilate. **22** Boli odito otaawa lowatotia deu masaatia botieelo Allahu Taaála mamongohi mai penu boli wolo upohile mola lo Eeya o-Lio." **23** "Wutatumu mamuli tumumulai," tahuda maó li Isa oli Marta. **24** Ti Marta lolametaó, "Otaawa lowatotia tei Lajarus mamuli tumumulai wonu taa mate bonguloola to Dulahu Kiama." **25** "Waulo tamongohi mai tutumulo wau mopobongu mai taa mate," tahuda maó li Isa odeli Marta "Taa u palacaya ola-U matumumulo, eleponu tio mailate. **26** Wau taa tumu-tumulo wau palacaya ola-U, diilalo mate ohiheo-hiheolo maó. Wolo yio palacaya tosuáli boito?" **27** "Eeya," tametaó li Marta, "Watotia palacaya Eeya Walaó Allahu Taaála, Olongia Tamoo-poáahua tamamei dungga mai ode dunia botie." **28** Lapataó ti Marta loloiya maó odito, tio mota lotiangai oli Maria, wutatio wau lopo lohumaó olio, "Ti Paaá Guru woluo tewe; tio hemohintu olemu," **29** Loódungohe uito, ti Maria huáa tilimihulo, tulusi malo dunggaya woli Isa. **30** Tou boito, ti Isa diipo tilumuwoto ode kambungu. Tio donggo totambati li Marta tou lodunggaya wo-Lio. **31** Tau-tauwalo Yahudi tadonggo hipoliyanga oli Maria tobele, loóonto oli Maria tilimihulo wau huáa yilumualao; oditolio timongolio malo dudua olio, sababu helantobu limongolio tio monao ode kuubulu mola humoyongo. **32** Tou ti Maria leidungga totambati li Isa wau loóonto o-Lio, maloti bongghuulo mola ti Maria totalu li Isa wau loloiya, "Eeyai, wonu Eeya woluo tea tou boito, tantu wutato lowatotia diila yilate." **33** Tou ti Isa loóonto oli Maria hiyo-hiyongo, wau tau-tauwalo Yahudi talonaó mai woli Maria boito olo hehiyonga, hilaa-Lio masiluukali, wau oontonga lodehu daa hilaa-Lio. **34** Yi Tio malohintu maó olimongolio, "Toutoonu pilolobunga limongoli olio?" "Toduwolo mai bilohi lo Eeya," tametaó



limongolio. **35** Lapatao ti Isa mahilu moyongo. Yi tau-tauwalo Yahudi boito malo loiya, "Bilohi, donggo boli ponu-Lio olei Lajarus!" **37** Bo woluo towolota limongolio talo loiya, "Tio lopoooluli taa pitoo maloonto, yilongola Tio diila mowali mongabuto olei Lajarus alihu diila maó mate?" **38** Luli lodehu daa hilaa li Isa, lapatao malonaó mota ode kuubulu. Kuubulu boito yito gowa tuwau u hileutalio wolo botu leidaa. **39** "Poheiya maó botu boito," tahuda li Isa. Ti Marta wutato lo tailate boito, lolametao, "Bo Eeyai, tio mawopahui tokuubulu. Tantulo maó maboobolo mohutodu!" **40** Ti Isa lolametao oli Marta, "Diila mapilo tahuda-U mai olemu; Wonu yio palacaya, yio mamooonto malo odito udaa kawasa lo Allahu Taála!" **41** Yi timongolio malo pohinggi botu boito. Lapatao ti Isa yilumanggela mola ode hulungo wau loloiya, "Oduolo, Paapa, sababu ti Paapa malo dungohei olaatia. **42** Otaawa lowatia ti Paapa laito modungohei olaatia, bo watia molojiya maó utie, ode tau-tauwalo tawoluo tea; alihu timongolio palacaya deu boti Paapalo talolao mai olaatia." **43** Lapatao loloiya maó odito, ti Isa malo ngiibode wolo suala u loohuu, "Lajaru, lualoolo mai!" **44** Yi mailumualai taa mailate boito. Uluu wau oatio donggo bolubolu lolatu, wau bayalio donggo tautaubu wolo kaingi taubu baya. "Yinggilalo latulio alihu tio bebasi monao," tahuda maó li Isa totau-tauwalo teto. **45** Dadaata tau-tauwalo Yahudi talonaó mai lomilohe oli Maria, palacaya toli Isa tou timongolio loonto u lotoduo mai boito. **46** Bo dengolo lota towolota limongolio lonaó mota ode taulo Parisi wau lopo duloheo wolo u mapilohutu li Isa. **47** Sababu uito tau-tauwalo Parisi wau mongo iimamu tauwa malohutu dudunggaya wolo Mahakama Agama. Timongolio loloiya, "Wolo umusi pohutuwonto? Tau botie malohutu dadaata u moolinggolabu! **48** Wonu hulianto maó Tio mololaalaita odie, ngoamila tau mapalacaya o-Lio. Wau pulitio maó tahidihima kawasa lo Roma mamonaó mai wau mongantulu Bele lo Eeya wau ngoilanggubu bangusanto!" **49** Ngotaalio limongolio tailunte Kayapas, iimamu daa totaunu boito, loloiya, "Timongoli diila motota lolo-loolo. **50** Wolo timongoli diila mongalati deu domi ulipu, lebe mopioheo taangota mate wolo ngoilanggubu bangusa moantulu?" **51** Otutuulio maó tei Kayapas loloiya uito, diila lonto pikiilangilio lohihilao. Bo odelo iimamu daa

totaunu boito tio lonubuwati mai deü ti Isa maamate duólo bangusa lo Yahudi. **52** Wau diila bo ode bangusa lo Yahudi wambaó, bo olo u mongambu wau mopotuwau maó mongo walaó Allahu Taáala tamalo bubuuáyawa. **53** Tumulalo mai todulahu boito tahidihima kawasa lo Yahudi malo heeluma u momate li Isa mate-mateelo maó. **54** Sababu uito ti Isa diilalo lotibilohai totalu lotaa dadaata towolota tauo Yahudi. Tio malo lolaa maó Yudea, tulusi lonaó ode kota u ilunte Epraim membideó lohuta datahu u luasi daá wau delita. Mota teto Tio lotibiluloá peé-peéenta wolo tahiduduá o-Lio. **55** Tou boito malembidei Dulahu Buka Paska lo Yahudi. Dadaata taa lonto kakaa-mbunguwalo malonaó mola ode Yerusalemu moponaó lo upacala mopobelesi batanga tou dipolulio lameyangi boito. **56** Timongolio hemo lolohe li Isa wau tou hiambua to Bele lo Eeya, timongolio malo loiya ngota timongota, "Woloolo mola huhamaamu? Tanu tio diila monaó mai ode lameyangi botie." **57** Timongolio loloiya maó uito sababu mongo iimamu tauwa wau tau-tauwalo Parisi malo polualaó palenta deü taa motota toutoonu ti Isa woluo, musi mopo dulohei alihu Tio mowali waúpolo.

**12:1** Wolonggui mola tou diipo Dulahu Buka Paska, ti Isa lonaó mola ode Betania. Totambati boito bilu-biluloá tei Lajarus tamaa bilongu-Lio mai lonto opopate. **2** Mola teto ti Isa tilamelaó limongolio, wau ti Marta talohinta o-Lio. Tei Lajarus wau tahe tiloduo lotihuloáa lolamela peé-peéenta woli Isa. **3** Lapataó ti Maria lonaó mai lodelo yinulo Narwastu moonu u mahale daá otanu ngoputu loliiteri. Tio loluwataó yinulo boito ode oáati Isa, lapataó malo maideó wolo huwoio. Ngoilanggubu bele boito mailoonulo mola, sababu yinulo moonu boito. **4** Bo tei Yudas Iskariot, tala ngota muri li Isa -- talapatio maó lohiyanati o-Lio -- loloiya maó. **5** "Yilongola yinulo moonu boito diila pilotali wolo halaga tolo hetuto doi talaá, wau doilio wohi mota ode taa mosikini?" **6** Tei Yudas loloiya odito diila kalana tio mopoótuoto taa mosikini bo sababu tio mootaówa. Tio helohama doi lokasi peé-peéenta wolo doi utilahu maó to olio. **7** Boti Isa lotahuda, "Huliaalo maó taabua boito! Tio lohutu uito duólo dulahu u polobungalo ola-U. **8** Taa mosikini laito woluo towolota

limongoli, bo Wau diila." **9** Dadaata taulo Yahudi loodungohe deu ti Isa woluo to Betania, oditolio timongoli malonaó mola odito. Timongolio lonaó mola diila bo sababu ti Isa, bo sababu timongolio olo ohilaa momilohe olei Lajarus tamaa bilongu li Isa lonto opopate. **10** Uito sababuulio mongo iimamu tauwa ohilaa momate olo olei Lajarus mate-mateelo maó; **11** sababu tio maloó sababu dadaata taulo Yahudi lololaa maó olimongolio wau palacaya li Isa. **12** Loloombulio mola taa dadaata tamalonaó mai u mopolame Paska loodungohe deu ti Isa donggo tononaó-Lio dulu-dulunga ode Yerusalemu. **13** Yi timongolio malohama duduu-ngowaalo Palemu tulusi mota lolutulai o-Lio, sambela hiwaatia wolo wengahe daá, "Pujiaalo mola Allahu Taála! Mabala-balakatilo Tio tadungga-dungga mai to tanggulo Eeya. Mabala-balakatilo Olongia lo Isirailu!" **14** Ti Isa loótapu kolodai tuwau udonggo buboto, wau tilaéa-Lio. Yi malo toduwolo u leitulade todelomo Kitabi: **15** "Diila oohe, puusili lo Sion! Bilohilo Olongiaamu dungga-dungga mai, taétaé tokolodai buboto tuwau!" **16** Tou boito tahiduduá li Isa diipo mongalati ngoáamilalo boito. Bo lapatio maó ti Isa piloudaá wolo opapate-Lio, bolo timongolio loóéela mola deu u pilohutu lotau-tauwala o-Lio boito malei tuladu todelomo Kitabi tomimbihu o-Lio. **17** Tau-tauwalo tawoluo tou ti Isa lotianga olei Lajarus yilumulai lonto kuubulu wau lopobongu mai olio lonto opopate, mololaita helongohi sakusi pasali losuáli boito. **18** Uito sababulio taa dadaata boito lonaó mota odeli Isa sababu timongolio loodungohu deu maa Tiolo talohutu u moolinggolabe boito. **19** Yi tau-tauwalo Parisi malo loiya ngota timongota, "Ito diila mowali mohutu wolo-wolo! Bilohilo wambaó, ngoilanggubu dunia lonaó loduduá o-Lio!" **20** Towolota lotau-tauwalo talonaó ode Yerusalemu mola lomaya to lameyangi boito woluo olo dengolo lota taulo Yunani. **21** Timongolio lonaó mai odelei Pilipusi wau loloiya maó, "Wutato, wonu mowali amiaatia ohilaa modunggaya woli Isa." (Tei Pilipus asaliilio lonto Betsaida to Galilea.) **22** Yi tei Pilipus lonaó mota lopoótaa suáli boito odelei Andreas, wau lapataó timongolio duduulota lopo tunggulaó odeli Isa. **23** Ti Isa lotahuda maó ode limongolio, "Mawakutuulio Walaó Manusia poudaáalo. **24** Otutu banali tahuda-U botie; Wonu pale ngobotu diila pomulolo ode delomo huta wau

mate, pale boito madebo ngobotu wambaó. Bo wonu bili lopale boito mate, bolo bili boito mamongohi mai tilapulo dadaata pale. **25** Taa motoliángo tutumulio todunia botie, maóolia lo tutumulio. Bo taa molonuó tutumulio todunia botie, mamolaalaó duólo tutumulo ututuulio tutu wau ohiheo-hiheolo maó. **26** Taa u motohilaa momaya ola-U musi moduduá ola-U; alihu tamoomayawa ola-U mowali peé-peéenta wola-U tóutoonu Wau woluo. Taa u momaya ola-U mahulumatio li Paapa-U." **27** "Hilaa-U lawa-lawalo; wolo umusi loiyaa-U botia? Wolo waajibu Wau molojiya, 'Paapa, lopatalo mai Watia monto saaáti botie'? Bo tumbaó u molaasa maó saaáti polodutolo botieelo Watia lonaó mai. **28** Paapa, poudaáalo mola tangguli Paapa!" Yi dungo-dungohei suala lonto hulungo lotahuda mai, "Wau malo poudaá o-Lio, wau Wau mamuli mopoudaá o-Lio." **29** Taa dadaata tawoluo teto loódungohe suala boito. Timongolio malo loiya, "Uito bulonggodu!" Bo woluo olo talo loiya, "Diila! Malaikati tahemo bisala wo-Lio". **30** Lapataó ti Isa lotahuda maó olimongolio. "Suala boito ilodungohe, diila duólo polohuna daá ola-U, bo duólo polohuna daá olemu. **31** Botia maa wakutuulio dunia butoólo; botia takawa-kawasa todunia botie powulidulo. **32** Bo Wau botie, wonu Wau mapilo laiio toitaato dunia, mabantanga-U ngoáamila tau ode ola-U." **33** Tio lotahuda odito u lopoilaalo woloolo mola dudelolio tou Tio maamate maó. **34** Taa dadaata boito loloiya maó o-Lio. "Moduduá Buku lo Butoó lami, Olongia Tamoo-poáahua matumumulo ohiheo-hiheolo maó. Woloolo mola Yio mowali molojiya deu Walaó Manusia musi polaiólo toitaato dunia? Tatoonu Walaó Manusia boito?" **35** Ti Isa lolametaó, "Bo u ngopeé mola tilango boito woluo towolota limongoli. Oditolio pononaólo ngotilonggadu tilango boito donggo woluo, alihu timongoli diila maó odungga lou modiólomo. Taa monaó todelomo u modiólomo diila otaawalio ode utoonu naóolio. **36** Pomalacayalo to tilango boito, ngotilonggadu tilango boito donggo woluo to olemu, alihu timongoli mowali mongo walaó lo tilango." Lapataó ti Isa lotahuda maó odito, Tio lonaó lonteeto mola wau diila mohuto mopobilohe batanga olimongolio. **37** Eleponu madadaata u moólinggolabe hepilohutu li Isa totalu limongolio, timongolio debo diila palacaya o-Lio. **38** Yi malo toduo wolo uiloiya li Nabi Yesaya, "Eeya, tatoonu tapalacaya

tohabari lomongo watotia? To olita kawasa lo Eeya pilopo bilohei?" **39** Uito sababuulio timongolio diila moó palacaya, sababu tei Yesaya malo loiya olo, "Allahu Taáala lotahuda, **40** 'Wau mopopitoó mato limongolio, mohutu hilaa limongolio diila mowali bolióolo; alihu mato limongolio diila maó moóonto, pikiilangi limongolio diila maó mongalati. Alihu timongolio diila maó mohualingai ode ola-U, lapataó Wau mamó pooluli olimongolio.' "**41** Tei Yesaya loloiya odito sababu tio maloóonto odudaá li Isa, wau helo bisala tomimbihu o-Lio. **42** Eleponu odito, dadaata tau, tumbaó towolota lo tahidihima kawasa lo Yahudi palacaya li Isa. Bo timongolio diila buheli motolongaku uito wolo juujulu, sababu timongolio moohe diila bolo taulo Parisi diila mongohi olimongolio tumuwoto ode bele potabiaalo. **43** Timongolio lebe motohilaa moótapu poloilaalo momuji monto manusia wolo polohalaga lo Allahu Taáala. **44** Lapataó ti Isa malo ngiibodu, "Taa palacaya ola-U, diila to ola-U tio palacaya, bo to o-Lio talolao mai ola-U. **45** Wau taa umoóonto ola-U, moóonto o-Lio talolao mai ola-U. **46** Wau dungga-dungga mai ode dunia botie odelo tilango, alihu ngoáamila taa palacaya ola-U diila tamoti biluloá todelomo u modiólomo. **47** Taa modungohe pongaajali-U, bo diila moduduáaó -- diila Wau tamo hukuumaní olio. Sababu Wau dungga-dungga mai diila mai momutoó dunia botie, bo mai mopoáahu maó. **48** Taa diila mololimo ola-U wau diila modungohe u tilahuda-U, mawoluo tamo mutoái olio. Tahuda upilo tunggulo-U mai, ui-uitolo u mamó mutoó olio to Dulahu Kiama. **49** Sababu Wau diila lotahuda mai to hilaa-U lohihilao; ti Paapa talolao mai ola-U, mati Paapalo boito talo malentai ola-U wolo uwajibu potahuda-U wau u potunggulo-U. **50** Wau otaawa-U deú palentaa-Lio boito mongohi tutumulo ututuulio tutu wau ohiheo-hiheolo maó. Yi Wau mopo tunggulai debo odelo upilo ngaajali li Paapa ola-U."

**13:1** Ngohui tou diipo Dulahu Buka Paska, otaawa li Isa deú maa wakutuulio Tio mololaa maó dunia botie wau muli mohulinga mola odeli Paapa-Lio. Tio momonu totau-tauwalo talowali milikii-Lio todunia, wau Tio debo momonu olimongolio tunggula pulitio. **2** Ti Isa wau tahiduduá o-Lio donggo hipolamela hui. Ibilisi malo potuwoto niyatilio ode hilaa lei

Yudas walaée Simon Iskariot u mohiyanati li Isa. **3** Otaawa li Isa deü ti Paapa-Lio malohudu mai ngoáamila okokawasa ode o-Lio. Otaawa-Lio olo deü dudungaa-Lio mai monto Allahu Taáala wau mamuli mohualinga mola ode Allahu Taáala. **4** Sababu uito Tio tilimihulaó, malomuó jumba-Lio, wau lopo bintolaó hando to wohuta-Lio. **5** Lapataó uito Tio lohuwataó taluhu ode delomo basi tuwau, tulusi malongulo oáato lo tahiduduá o-Lio wau pilohengu-Lio wolo hando u bibiintolo to wohuta-Lio. **6** Maa tilunggulaó Tio odelei Simon Petrus, talo loiya, "Eeya, diila pongalo aakali Eeya tamaa mongulo oáato lowatotia?" **7** Ti Isa lolametaó, "Botia yio diila mongalati wolo u pohutuwo-U botie, bo yio de mamongalati maó." **8** "Keke, Yaa Eeyau," loiya maó lei Petrus odeli Isa, "Sama-samaata diila maó wuloi oáato lowatotia yaa Eeyau!" Bo tahuda maó li Isa, "Wonu Wau diila mongulo maó olemu, yio diila owumbuta wola-U." **9** Ualei Simon Petrus, "Wonu odito, yaa Eeyau, diila bo oáato wambaó bo wolo uluu wau lunggongo lowatotia olo!" **10** "Taa u malolihi, malo belesi ngangaawaalo maó," tahuda li Isa odelei Petrus. "Tio diilalo palalu pobelesiyolo; ngopohia oáati. Timongoli botie malo belesi, bo diila ngoáamilalo." ( **11** Mailotaawa li Isa tatoonu tamamo hiyanati o-Lio. Uito sababuulio Tio lotahuda maó, "Timongoli botie malo beresi, bo diila ngoáamilalo.") **12** Lapataó ti Isa longulo oáati mongolio, Tio luli lopomake jumba-Lio wau luli lotihuloó. Lapataó Tio lotahuda maó olimongolio, "Tingga mongalati timongoli wolo u boheli pilohutu-U mola olimongoli?" **13** Timongoli longunte ola-U Guru wau Eeya. Wau memangi odito. **14** Wonu Wau odelo Eeya wau Guru mongulo mai oáatumu, yi timongoli olo waajibu mongunguuloa maó oáati mongoli. **15** Wau mongohi mai obaaya botie olimongoli, alihu timongoli olo mopohutu maó wolo umaa pilohutu-U mai olimongoli. **16** Otutu banali tahuda-U botie: wato ngota diila lebe udaá woli tuanilio, wau utolia ngota diila lebe udaá wolo talolao olio. **17** Wonu mailotaawa limongoli ngoáamilalo botie, potisangilo tutu timongoli wonu mopohutu maó uito. **18** Wolo u tilahuda-U mai botie diila tomimbihu olimongoli ngoáamila. Otaawa-U tita-tita tamaa tilulaotu-U. Bo wolo u tulatuladu todelomo Kitabi, musi motoduo mai, deüito-yito, 'Taa molamela wola-U, mamoluwali ola-U.' **19** Suáli boito

potunggulo-U mai botia olemu, tou diipo motoduo mai, alihu wonu suali boito de motoduo mai, timongoli mapalacaya maó deu Waulo Tio tailunte, WA-U WOLUO. **20** Otutu banali tahuda-U botie: Tatoonu taa u mololimo tailawo-U, mololimo ola-U. Wau tatoonu tamololimo ola-U, mololimo o-Lio tamalolao mai ola-U." **21** Lapataó ti Isa lotahuda odito, malodehu daá hilaa-Lio. Lapataó Tio lotahuda maó, "Otutu banali tahuda-U botie: tala ngota limongoli mamó hiyanati ola-U." **22** Tahiduduá o-Lio lobibiilohe ngota timongota wolo hilinggolabe daá sababu diila otaawa limongolio tatoonu tahe makusuduo-Lio. **23** Muri tapilonu li Isa hulohuloáa to ngotuwali li Isa. **24** Tei Simon Petrus longohi isalati olio, alihu tio mohintu maó li Isa wonu tatoonu tahe makusuduo-Lio. **25** Yi muri boito malo dudulaó odeli Isa wau lohintu, "Tatoonu tio, Eeya?" **26** Ti Isa lolametaó, "Taa u wohiya-U roti u polomo-U ode delomo manggo, matio-tiolo taulio." Yi ti Isa malohama roti ngopita, pilopo lomo-Lio ode delomo manggo; tulusi yilohi-Lio odelei Yudas walaée Simon Iskariot. **27** Lolamemeto lapataó tei Yudas lololimo roti boito, Ibilisi matilumuwo to ode delomo hilaalio. Lapataó ti Isa lotahuda maó olio, "Huáa pohutuwalo wolo u otohila pohutuwomu." **28** Diaaluo penu boli ngotaa maó limongolio tahi huloáa hipo lamelawa teto mongalati deu yilongola ti Isa lotahuda odito odelei Yudas. **29** Woluo tahemo lantobu li Isa deu Tio lopoáhu olei Yudas motali hitua-tuawua u palaluwolo to potihunggu boito, meaalo mongohi doi ngoidi ode taa mosikini -- sababu tei Yudas yito tamo dihimawa doi lokasi limongolio. **30** Lapataó tei Yudas lololimo roti boito, tio lato yilumualaó. Malei dungga mai hui. **31** Tou tei Yudas malonaó, ti Isa lotahuda maó, "Botia Walaó Manusia poudaáalo, wau Allahu Taáala mapo udaáalo moli o-Lio. **32** Wonu Allahu Taáala poudaáalo moli o-Lio, Tio olo poudaá mai lo Allahu Taáala moli batanga-Lio lohihilao. Tumbaó Allahu Taáala mahuáa mopoudaá mai o-Lio. **33** Mongo walaa-U, Wau diilalo mohiheo motibiluloá woli mongoli. Timongoli mamó lolohe ola-U, bo debo odelo umapilo tahuda-U ode tahidihima kawasa lo Yahudi, odito olo potahuda-U mai olimongoli; ode tambati u ponaówa-U, diila mowali onaówa limongoli. **34** Palenta bohu wohi-U mai olemu: Toliángilo ngota timongota, debo odelo Wau motoliángai olimongoli odito olo timongoli

musi mototoo-liānga. **35** Wonu timongoli mototoo-liānga, ngoāamila tau mamotota deū timongoli muri-U." **36** "Eeya, Eeya mamonaó ode utoonu?" yilintu maó lei Simon Petrus odeli Isa. Tāmetaó li Isa, "Ode utoonu ponaówa-U, yió diila mowali moduduá ola-U botia. Yió mamoduduá ola-U delapatio maó." **37** "Eeya, yilongola watotia diila mowali moduduá to Eeya botia?" yilintu maó lei Petrus poli, "Watotia iloheela lohilao mate wolo Eeya!" **38** Ti Isa lolametaó, "Otutu yió iloheela lohilao mate wola-U? Ototai maó, tou diipo maluó de mokukuyuu mai, yió mapoóotolu loloiya deū yió diila moóonuhe ola-U!"

**14:1** "Diila maó pobalisa hilaamu," tahuda li isa olimongolio.

"Pomalacayalo to Allahu Taaála, wau pomalacayalo ola-U olo. **2** Tobele li Paapa-U otambati dadaata upoti biluloáalo. Wau odito mola u mopo dapato tambati olimongoli. Wau diila tamo tahuda mai odito olemu, humayaalio uito diila odito. **3** Lapatio maó Wau odito mola u mopo dapato tambati olimongoli, Wau muli mohualingai wau mai molutula olimongoli, alihu toutoonu Wau woluo, timongoli olo woluo. **4** Ode tambati ponaówa-U otaawa limongoli dalalio." **5** Lapataó tei Tomas loloiya maó odeli Isa, "Eeya, diila otaawa lo mongowatotia ode utoonu ponaówa lo Eeya, woloolo mola otaawa lo mongowatotia dalalio?" **6** Tametaó li Isa, "Wau lo dalalo u pongo taawalo Allahu Taaála wau poótapulalo tutumulo. Diaaluo penu boli ngotaa maó tamowali monaó ode Allahu Taaála, wonu diila moli ola-U. **7** Humayaalio timongoli moóonuhe ola-U, tantulo maó timongoli mamooonuhe li Paapa-U olo. Botia timongoli malo oonuhe o-Lio wau malo oonto o-Lio." **8** Yi tei Pilipus loloiya maó odeli Isa, "Eeya, pobilohe mai ti Paapa boito to mongowatotia, alihu mongowatotia molaasa sanangi." **9** Boti Isa lolametaó, "Maa odito hiheolio Wau peé-peéenta woli mongoli, wau debo diipo iloonuhemu Wau, Pilipusi? Taa u malo oonto ola-U, malo oonto oli Paapa. Woloolo mola yió mowali molojiya, 'Pobilohe mai ti Paapa to mongowatotia'? **10** Pilipus! Wolo yió diila palacaya, deū Wau tuwau woli Paapa wau ti Paapa tuwau wola-U? Wolo umapilo tahuda-U mai olemu, diila lonto ola-U lohihilao. Ti Paapa-U tadebo tuwau wolau, Tiolo tamohutu mai ngoāamilalo boito. **11**



Pomalacayalo ola-U, deü Wau tuwau woli Paapa wau ti Paapa tuwau wola-U. Meaalo wonu diila, pomalacayalo sababu wolo u mapilo hutu-U mai. **12** Otutu banali tahuda-U botie: Taa palacaya ola-U, mamohutu maó wolo u mapilo hutu-U mai, -- tumbaó tio mamohutu ulebe udaá poli -- sababu Wau monaó mola odeli Paapa. **13** Wau penu boli wolo upohile limongoli to tanggulu-U, uito mapo hutuwo-U mai olimongoli, alihu ti Paapa-U poudaáalo moli Walaó. **14** Boli wolo wambaio upohile limongoli to tanggulu-U, mapo hutuwo-U mai." **15** "Wonu timongoli motoliangu-U, timongoli mamó duduá totoonulalo palentaa-U. **16** Wau mohile mola li Paapa-U, wau Tio mamongohi mai olemu Tamoo-tulungia wewo, tamaa motibiluloá peé-peéenta woli mongoli u ohiheo-hiheolo maó. **17** Tio boito Rohullah tamamo poilaalo mai obobanali pasali lo Allahu Taáala. Dunia diila loótolimo o-Lio, sababu diila loóonto meaalo loóonuhe o-Lio. Bo timongoli moóonuhe o-Lio, sababu Tio bilu-biluloá peé-peéenta woli mongoli wau tuwau woli mongoli. **18** Timongoli diila tatolaa-U tutuwau debo odelo tadidu otiilo otiyamo. Wau muli mohualingai ode olemu. **19** Bolo ngopeé mola dunia diilalo moóonto ola-U. Bo timongoli mamóonto ola-U. Wau sababu Wau tumutumulo, timongoli olo matumumulo. **20** Wonu meidungga mai dulahu boito, maótaawa limongoli deü Wau motituwau woli Paapa, timongoli motituwau wola-U, wau Wau motituwau woli mongoli. **21** Taa mololimo totoonulalo palentaa-U wau pohutuolio, tio-tiolo tamo toliangu-U. Ti Paapa-U mamomonu mai taa motoliango ola-U. Wau olo mamó toliango tau boito wau mopo bilohei batanga-U olio." **22** Tei Yudas (diila tei Yudas Iskarioti) lohintu maó li Isa, "Eeya, yilongola Eeya motohilaa mopoilaalo batanga lo Eeya to mongowatotia wau diila ode dunia?" **23** Ti Isa lolametaó, "Taa motoliangu-U, mamó duduá pongaajali-U. Ti Paapa-U mamomonu mai olio. Ti Paapa wau Wau mamei dungga mai ode olio wau motibiluloá wolio. **24** Taa diila motolianga ola-U, diila moduduá pongaajali-U. Pongaajali u ilodungohe limongoli boito, diila lonto ola-U, bo lonto li Paapa-U talolao mai ola-U. **25** Ngoáamilalo boito potahuda-U mai olemu ngotilonggadu Wau peé-peéenta woli mongoli. **26** Bo Rohullah, Tamoo-tulungia tamaa laolo mai li Paapa-U to tanggulu-U, Tiolo tamaa mongaajali olimongoli

totoonulolalo maó wau mamopoéela olimongoli ngoáamila umaa piloótaa-U olimongoli. **27** Salaamati tolaa-U maó olimongoli. Salaamati-U lohihilao uwohi-U mai olemu. Uwohi-U mai boito diila debo odelo uwohi lodunia olemu. Diila maó pobalisa hilaamu, diila maó oohe. **28** Mailo dungohe limongoli upilo tahuda-U mai, 'Wau mamonaó, bo Wau mamuli mohualingai ode limongoli' Wonu timongoli motolianga ola-U timongoli masanangi Wau monaó mola odeli Paapa-U, sababu ti Paapa-U lebe udaá wola-U. **29** Wau mopoótaa mai uito to olemu botia, tou ngoáamilalo boito diipo motoduo mai, alihu de wonu motoduo mai, timongoli mapalacaya. **30** Wau diilalo mobisala mai lebe dadaata maó toli mongoli, sababu mawakutuulio tahidihima kawasa lodunia botie mamonaó mai. Bo tio diila okawasa to batanga-U. **31** Bo ngoáamila boito musu motoduo mai alihu dunia mongalati deu Wau momonu oli Paapa wau hemohutu ngoáamila u pilomalentai li Paapa to ola-U. Naa, dulo ito monaóolo monteea."

**15:1** Tahuda maó li Isa poli, "Wau bungo lo angguru ututuulio tutu wau ti Paapa-U yito tamokele-kela maó ilengilio. **2** Timiidu tango to ola-U udiila momungo, panggee-Lio, wau timiidu tango u momungo, ilangiyalo duungio wau pobelesiyolo alihu lebe dadaata poli hungolio. **3** Timongoli malo belesi sababu pongaajali uilohi-U mai olimongoli. **4** Debo potituwaulo wola-U wau Wau olo madebo motituwau woli mongoli. Tango wambaó diila mowali momungo mai, ngopohia wonu tango boito debo to bungolio. Odito olo timongoli bo mowali momungo, wonu debo motituwau wola-U. **5** Waulo bungo lo angguru, wau timongoli tataa-ngolio. Taa u debo motituwau wola-U wau Wau wolio, mamomungo dadaata; sababu wonu diila wola-U, timongoli diila mowali mohutu wolo-wolo. **6** Taa u debo diila motituwau wola-U, mapo mahulolio debo odelo tango, lapataó mowali mohengu. Tataa-ngowaalo udebo odelo uito maimoóolo wau pomahulola ode delomo tulu, tulusi tumbilalo. **7** Wonu timongoli debo motituwau wola-U wau pongaajali-U debo todelomo hilaamu, pohileaalo odeli Paapa-U boli wolo u otohilaa limongoli; hihiiile limongoli boito mapoó poluo-Lio mai. **8** Wonu timongoli momungo dadaata, ti Paapa-U poudaáalo mola; wau lou odito otu-otutuulo maó

timongoli mowali muri-U. **9** Debo odelo ti Paapa-U lomonu mai ola-U, oditolo olo Wau momonu olimongoli. Mamusi timongoli tatapu wau molotolo hilao tumutumulo odelo taa u pilonu-U. **10** Wonu timongoli moponaó ngoáamila palentaa-U, timongoli debo tatapu wau molotolo hilao toponu-U. Tutuuwauwa debo odelo Wau debo molotolo hilao toponu li Paapa-U sababu loponaó ngoáamila palentaa-Lio. **11** Ngoáamilalo botie pooótaa-U mai olimongoli, alihu owengahu-U woluo todelomo hilaa limongoli, wau owengahi mongoli mowali wimu-wimumuto ngoáamilalo. **12** Uti-utieelo palentaa-U; toliángalo ngota timongota, tutuuwauwa debo odelo Wau momonu olimongoli. **13** Taa motoliánga daá mongo sahabatilio tio-tiolo tamongohi maó tutumulio ode limongolio. **14** Timongoli mongo sahabati-U, wonu timongoli mohutu maó wolo upilo malenta-U mai olimongoli. **15** Timongoli diilalo tanggula-U wato, sababu wato diila motota wolo u hekalaja lituanilio. Timongoli tanggula-U mai sahabati, sababu ngoáamila u dilungohe-U lonto li Paapa-U, mapiloótaa-U mai olimongoli. **16** Diila timongoli talo lulaoto ola-U. Waulo talo lulaotai olimongoli, wau mopoáhu olimongoli u momungo dadaata -- huhuu-ngowaalo udiila mowali binasa. Yi ti Paapa-U mamongohi mai olimongoli boli wolo upohile mola limongoli o-Lio to tanggulu-U. **17** Uti-utieelo palentaa-U to olemu: toliángalo ngota timongota." **18** "Wonu dunia molunui mongoli, eelai maó deü Wau maleimulo yilonuó lodunia. **19** Humayaalio timongoli miliki lodunia, timongoli matoliángo lodunia debo odelo milikiilio. Bo Wau malo lulaoto olimongoli lonto dunia botie, oditolio timongoli diilalo miliki lodunia, uito sababuulio dunia molonui mongoli. **20** Eelei maó wolo umapilo tahuda-U mai olimongoli, 'Wato diila lebe udaá woli tuanilio.' Wonu timongolio malo ngalinaya ola-U, timongolio olo mamu ngalinaya olimongoli. Wonu timongolio moduduó pongaajali-U, timongolio olo mamoduduó pongaajalimu. **21** Ngoáamilalo boito mapohutuo limongolio ode limongoli, sababu timongoli muri-U, sababu timongolio diila moónuhe o-Lio talolao mai ola-U. **22** Humayaalio Wau diila lonaó mai wau diila lopoótaa ngoáamilalo boito ode limongolio, timongolio diila ilodusa. Bo botia timongolio diilalo o alaasani duólo dusa limongolio. **23** Taa molonuuu-U, molonua li Paapa-U. **24**

Humayaalio tohuungi mongolio Wau diila lohutu susuu-aliyaala udiipo peenta maó pilohutu lotaa wewo, yi timongolio diila ilodusa. Bo botia timongolio malo oonto wolo u pilohutu-U, wau timongolio molonuuu-U meaalo li Paapa-U. **25** Bo mawajibulio odito, alihu motoduo mai wolo u tulatuladu todelomo Buku Butoó limongolio, deúito-yito: 'Timongolio molonuuu-U diila o alaasani.' **26** Wau mamolao mai olemu Tamoo-tulungia u asaliilio mai monto li Paapa-U. Tiolo Rohu tamamo poilaalo mai obobanali pasali lo Allahu Taaála. Wonu bolo Tio meidungga mai Tio mamongohi sakusi pasali ola-U. **27** Wau timongoli olo musi mongohi sakusi pasali ola-U, sababu timongoli mapee-peenta wola-U anggadu bohuliolo mai.

**16:1** Ngoáamilalo boito poótaa-U mai olimongoli alihu timongoli diila maó momaahu iimani limongoli. **2** Timongoli malualolio monto bebeeleyaala potabiaalo. Wau mamei dungga wakutuulio deú taa momate olimongoli mate-mateelo maó mamó lantobu tio hemotiwato to Allahu Taaála. **3** Timongolio mohutu mai uito olemu sababu timongolio diipo moóonuhe li Paapa-U meaalo ola-U. **4** Bo botia poótaa-U mai uito olemu, alihu wonu uito bolo motoduo mai, maéela mola limongoli deú Wau malo poótaa mai uito olimongoli." "Suáli botie diila piloótaa-U olimongoli tou bohulio mai, sababu Wau donggo pee-peenta woli mongoli. **5** Bo botia Wau mamó hualinga mola ode o-Lio talolao mai ola-U; wau diaaluo penu boli ngotaa maó monto olimongoli tamohintu mai ode utoonu ponaówa-U. **6** Botia tumbaó hilaamu lowali siluukali, sababu Wau lopoótaa mai suáli boito olemu. **7** Bo Wau molele mai u otutu olemu: Lebe mopioheó olimongoli, wonu Wau mohualinga mola; sababu wonu wau diila mohualinga mola, Tamoo-tulungia boito diila tamei dungga ode olemu. **8** Wonu Tio meidungga, Tio mamopo ilaalo ode dunia boli lodusa u otutuulio maó, monto wolo u otutu, wau monto hukuumani lo Allahu Taaála. **9** Tio mamopo ilaalo mai deú diila palacaya to ola-U yito dusa; **10** deú Wau otutu, sababu Wau mohualinga mola odeli Paapa wau timongoli diilalo moóonto ola-U; **11** wau deú Allahu Taaála malo lumula lohukuumani mai, sababu tahidihima kawasa lodunia botie mahilu-kuumani. **12** Donggo

dadaata u ohilaa polele-U mai olemu, bo masaatia botie timongoli diipo mambo mololimo maó. **13** Bo wonu Rohu boito meidungga mai, deuito-yito Tio tamopo ilaalo mai obobanali pasali lo Allahu Taáala, timongoli madelloo-Lio u moóonuheó ngoáamilalo obobanali. Tio diila tamotahuda monto batanga-Lio lohihilao bo motahuda mai wolo u mailo dungohe-Lio, wau Tio mamopo poótaa mai olemu wolo u mamowali todulahu momooli. **14** Tio mamopo údaá ola-U, sababu wolo u pilotunggu-Lio mai olemu, tilolimo-Lio lonto ola-U. **15** Ngoáamila uwoluo toli Paapa yito hakuu-U. Uito sababuulio Wau motahuda mai deu wolo upilo tunggulai lo Rohu olemu, tilolimo-Lio lonto ola-U." **16** "Bolo ngopee mola timongoli diilalo moóonto ola-U, wau olo bolo ngopee mola poli timongoli mamóonto ola-U." **17** Dengolo lota tahiduduá li Isa mawiwiintua ngota timongota, "Wolo makusudu-Lio u Tio lotahuda olanto: 'Bolo ngopee mola timongoli diilalo moóonto ola-U, wau olo bolo ngopee mola timongoli mamóonto ola-U'? Wolo poli makusudu-Lio lou: 'Wau mohualinga mola odeli Paapa?'" **18** Timongolio hipohintua laito "Wolo boliilio maó, 'ngopee mola'? Ito diila mongalati Tio hemobisala pasali loolo!" **19** Otaawa li Isa timongolio motohilaa mohintu o-Lio. Oditolio Tio lotahuda maó, "Engonti tilahuda-U mai, 'Bolo ngopee mola, timongoli diilalo moóonto ola-U, wau olo bolo ngopee mola timongoli mamóonto ola-U'. Maa uito u heposuáalia limongoli towolota limongoli?" **20** Pomalacayalo, timongoli mahumoyongo wau mohilimuta, bo dunia mameengahu. Timongoli maa osuusawa lohilao, bo osuusamu boito mamoboliá mowali owengahu. **21** Wonu taabua ngota wimbideó motutu mai, tio suusa, sababu maa wakutuulio tio modutolo. Bo odito walaio mapilo tutulio mai, taabua boito mamolipato dudutolio sababu meengahu deu taunge ngota mapilo tutulio mai ode delomo dunia. **22** Odito olo woli mongoli: Botia timongoli osuusawa lohilao, bo Wau mamuli modunggaya woli mongoli, yi hilaamu mameengahu; wau diaaluo penu boli ngotaa maó tamowali mohama owengahu boito monto hilaamu. **23** Todulahu boito, timongoli diilalo mohintu wolo-wolo poli ola-U. Pomalacayalo: Penu boli wolo upohile mola limongoli toli Paapa-U to tanggulu-U, uito mawohi mai li Paapa-U olemu. **24** Tunggula tosaati botie timongoli diipo lohile mola

wolo-wolo to tanggulu-U. Pohileaalo mola, yi timongoli mamohile li Paapa-U to tanggulu-U; ototai maó, Wau diilalo momake lumadu, bo motahuda wolo juujulu pasali li Paapa-U. **26** Tou boito timongoli mamohile li Paapa-U to tanggulu-U; ototai maó, Wau diila tamohile monto li Paapa-U duólo olimongoli, **27** sababu ti Paapa-U lohihilao momonu olimongoli. Tio momonu olimongoli sababu timongoli motolianga ola-U, wau palacaya deú Wau dungga-dungga mai lonto li Paapa-U. **28** Memangi asalii-U lonto li Paapa-U, wau malei dungga mai ode delomo dunia. Bo botia Wau mamololaa maó dunia u mohualinga mola odeli Paapa-U." **29** Lapataó tahiduduá li Isa loloiya o-Lio, "Botia Eeya lotahuda mai wolo juujulu wau diila lomake lumadu, **30** wau otaawa lo mongowatotia deú otaawa lo Eeya totoonulalo u hitua-tuawua. Diila palalu penu boli ngotaa maó mohintu wolo-wolo ode Eeya. Sababu uito mongowatotia palacaya to Eeya dungga-dungga mai lonto Allahu Taáala." **31** Ti Isa lolametaó olimongolio, "Oditolio mapalacaya timongoli botia? **32** Eelai maó! Saaátilio mamei dungga, tumbaó malei dungga mai, timongoli mapo bubuu-ayaalio. Ngota-ngota timongoli mamohile li Paapa-U to tanggulu-U; ototai maó, Wau diilalo momake lumadu, bo motahuda wolo juujulu pasali li Paapa-U. **33** Ngoáamilalo botie polele-U mai alihu timongoli moótodo mai moáahu sababu motituwau wola-U. To dunia timongoli mamodutolo. Bo poótoheeta mola hilaamu! Dunia maa ilolahe-U!"

**17:1** Lapataó lotahuda maó odito, ti Isa yilumanggela mola ode hulungo wau loloiya, "Paapa, botia malei dungga wakutuulio. Poudaáalo mai Walai Paapa, alihu Walai Paapa olo mopoudaá mola li Paapa. **2** Ti Paapa malohudu mai kawasa to ngoáamilala umati lomanusia ode Walaó, alihu Tio mongohi tutumulo ututuulio tutu wau ohiheo-hiheolo maó ode ngoáamilala tamailudu mai li Paapa o-Lio. **3** Uti-utieelo tutumulo ututuulio tutu wau ohiheo-hiheolo maó; alihu tau motota li Paapa, tuwa-tuwaulo Allahu Taáala tabanali, wau moóonuhe li Isa Almasi tailao mai li Paapa. **4** Watia malo poudaá mola li Paapa toitaato dunia botie wolo lopoó lapato kalaja u

pilopoáhu mai li Paapa olaa-Tia. **5** Paapa! Poudaáalo mai Watia botia toli Paapa, wolo odudaá u mililiki lo Watia peé-peéenta woli Paapa tou dunia botie diipo pilowali mai. **6** Watia malo poótaa li Paapa ode tau-tauwalo lonto dunia botie tamailudu mai li Paapa olaa-Tia. Timongolio yito miliki li Paapa, wau ti Paapa malohudu mai olimongolio ode Laatia. Timongolio malo duduá tahuda li Paapa. **7** Botia otaawa limongolio deú ngoáamila uiludu mai li Paapa olaa-Tia asaliilio mai lonto li Paapa. **8** Mapilo tunggulaó lo Watia olimongolio tahuda u pilotahuda mai li Paapa olaa-Tia; wau timongolio malo lolimo maó. Otaawa limongolio deú Watia otu-otutuulo maó dungga-dungga mai lonto li Paapa wau timongolio palacaya deú ti Paapaalo tamalolao mai olaa-Tia. **9** Watia moduá mola ode limongolio. Watia diila moduá duólo dunia bo duólo tamailudu mai li Paapa olaa-Tia, sababu timongolio deúito-yito miliki li Paapa. **10** Ngoáamila miliki lo Watia yito miliki li Paapa olo; wau ngoáamila miliki li Paapa yito miliki lo Watia olo. Watia pilopo udaá towolota limongolio. **11** Botia Watia monaó mai odeli Paapa. Watia diilalo motibiluloá todunia; bo timongolio woluo todunia. Paapa tamantali! Dahailo mai timongolio wolo okokawasa tangguli Paapa, deúito-yito tanggulo u mailohi mai li Paapa olaa-Tia -- alihu timongolio mowali tuwau, tutuuwauwa debo odelo ti Paapa wau Watia tuwau olo. **12** Tou Watia donggo peé-peéenta woli mongolio, Watia malodaha olimongolio wolo okokawasa tangguli Paapa -- tanggulo uilohi mai li Paapa olaa-Tia. Watia malodaha olimongolio wau diaaluo penu boli ngotaa maó limongolio tailooli, ngopohia tio tameemangi musiilio mooli; alihu woleeto boito motoduwolo mai wolo u tulatuladu todelomo Kitabi. **13** Botia Watia monaó mai odeli Paapa. Ngoáamilalo botie tilahuda maó lo Watia tou donggo todunia; alihu timongolio wolo tióotutua moólaasa owengahu lo Watia. **14** Watia malopo tunggulaó olimongolio tahuda li Paapa, wau dunia molonui mongolio, sababu timongolio diila miliki lodunia, tutuuwauwa debo odelo Watia olo diila miliki lodunia. **15** Watia diila mohile alihu ti Paapa mohama mola olimongolio monto dunia botie, bo Watia mohile alihu ti Paapa modaha olimongolio monto Ibilisi. **16** Tutuuwauwa suáliilio debo odelo Watia diila miliki lodunia, timongolio olo diila miliki lodunia. **17** Powaliyalo mai

timongolio tomodu miliki li Paapa moli obobanali; tahuda li Paapa boitolo obobanali. **18** Debo odelo ti Paapa malolao mai olaa-Tia ode dunia, odito olo Watia lolao olimongolio ode dunia. **19** U polohuna daá olimongolio, Watia mohudu mola batanga odelo tomodu miliki li Paapa, alihu timongolio olo mowali tomodu miliki li Paapa moli obobanali. **20** Diila bo ode limongolio wambaó Watia moduá mola. Watia moduá mola olo ode tau-tauwalo tamaa palacaya olaa-Tia lo ososakusi limongolio botie. **21** Pohile laa-Tia, Paapa, alihu timongolio ngoáamila mowali tuwau, debo odelo ti Paapa lotituwau mai wolaa-Tia, wau Watia woli Paapa. Pohileaala duá timongolio mowali tuwau wolaan-To alihu dunia palacaya deú ti Paapa talolao mai olaa-Tia. **22** Watia malohudu maó olimongolio odudaá, uiludu mai li Paapa olaa-Tia, alihu timongolio mowali tuwau, tutuuwauwa debo odelo Ito olo tuwau; **23** Watia woli mongolio, wau ti Paapa wolaa-Tia; alihu timongolio otu-otutuulo maó tuwau. Yi dunia mamotota maó deú ti Paapaalo talolao mai olaa-Tia, wau deú ti Paapa momonu olimongolio debo odelo ti Paapa lomonu olaa-Tia. **24** Paapa, otohila laa-Tia alihu timongolio, tailudu mai li Paapa olaa-Tia, woluo peé-peéenta wolaa-Tia totambati Watia woluo, alihu timongolio moóonto odudaá laa-Tia; deúito-yito odudaá uiludu mai li Paapa olaa-Tia; sababu ti Paapa lomonu olaa-Tia tou dunia diipo pilowali mai. **25** Paapa taaadili! Dunia diila moóonuhe li Paapa; bo Watia moóonuhe li Paapa; wau tau-tauwala botie motota deú ti Paapa talolao mai olaa-Tia. **26** Watia malo poilaalo tangguli Paapa ode limongolio; wau Watia madebo mohutu maó odito, alihu ponu li Paapa olaa-Tia debo todelomo hilaa limongolio wau Watia motituwau woli mongolio."

**18:1** Lapatio maó ti Isa loduá mola odito, Tio wolo tahiduduá o-Lio malonaó ode ngotuwali lo Dutula Kidron. Mota teto woluo ilengi tuwau u pilomuloa wolo bubuu-ngawaalo, wau ti Isa wolo tahiduduá o-Lio tilumuwoto ode ilengi u pilomuloa wolo bubuu-ngowaalo boito. **2** Tei Yudas tamoo-hiyanatia boito, motota lotambati boito; sababu ti Isa tingga maito hemo tiambu mota teto wolo tahiduduá o-Lio. **3** Yi tei Yudas lonaó mota ode tambati boito wolo ngopasuukani suludadu lo Romawi wau



dengolo lota tamoo-kawalia Bele lo Eeya tailahula lomongo iimamu tauwa wau tau-tauwalo Parisi. Timongolio hideloa tingolo, lantera wau molongo.

**4** Otaawa li Isa ngoáamila u mamotoduo mai to batanga-Lio. Oditolio Tio malo himbide mota ode tau-tauwala boito wau lohintu maó, "Tatoonu tahe lolohu limongoli?" **5** "Ti Isa, taulo Najaret," tametaó limongolio. "Waulo Tio," tahuda maó li Isa. Tei Yudas tamoo-hiyanatia tihutihula teto woli mongolio. **6** Tou ti Isa lotahuda maó olimongolio, "Waulo Tio," timongolio ngoáamila matilumouli tulusi leibalata mola tohuta. **7** Peéentapo ti Isa lohintu maó olimongolio, "Tatoonu tahe lolohu limongoli?" "Ti Isa taulo Najaret," tametaó limongolio. **8** "Mapilolele-U mai Waulo Tio," tahuda Isa. "Wau wonu memangi Wau tahe lolohu limongoli, poluliaalo mota tawewo limongoli botie monaó." ( **9** Wolo lotahuda maó odito, lotoduwolo mola wolo u mapilo tahuda li Isa tou dipo-dipolulio: "Paapa, monto tau-tauwala tailudu mai li Paapa olaa-Tia, diaaluo penu boli ngota maó tailooli.") **10** Tei Simon Petrus u delodelo mai wamilo tuwau, lomahutaó tulusi lolimadeó wato li iimamu daá tunggula loputu bulongalio olowala. Tanggulo wato boito Malkus. **11** Yi ti Isa lotahuda maó odelei Petrus, "Muli potaupa mola wamilumu ode taupio! Wolo to pikiilangimu Wau diila tamongilu hakati lo dudutolo uilohi mai li Paapa ola-U?" **12** Lapataó mongo pajule lo Romawi wolo kamudangilio wau tahipo kawalia lo Yahudi malo heupo wau lomungu li Isa. **13** Bohu-bohulio timongolio lodelo li Isa lotaalua wolei Hanas, tiyamo moluhengo lei Kayapas. Tei Kayapas boitolo iimamu daá totaunu boito. **14** Wau tio-tiolo tamalo nasehati to tahidihima kawasa taulo Yahudi deu lebe mopiohu ngotaalio mate maó duólo ngoáamila bangusa. **15** Tei Simon Petrus wau ngotaalio lomuri wewo loduduá li Isa. Muri uwewo botie oonuhe li iimamu daá; oditolio tio loduduá tilumuwoto peé-peéenta woli Isa ode paango lobebe li iimamu daá; **16** hiambola tei Petrus wimawima to bulemengio, tohuhebu. Lapataó muri uwewo boito lonaó mota ode bulemengio wau helo bisala wolo taabua moomayawa tahemodaha huhebu, lapataó malopo tuwotaó olei Petrus ode delomio. **17** Wato taabua tamoodahawa huhebu boito loloiya maó odelei Petrus, "Wuu, diila mayio-yiioolo tala ngota muri lotau boito?" "Diila," tametaó lei Petrus. **18** Tou boito dulente mohuhulo,

oditolio tahi pomayawa wau tahi pokawalia malopo leiita tulu duito wau timongolio lopo dengengo wawai mongolio teto. Tei Petrus lonaó mola odito wau tilimihulo peé-peéenta loti dengengo woli mongolio. **19** Ti iimamu daá helohintu li Isa pasali lo tahidudua o-Lio wau pasali lo pongaajali-Lio. **20** Ti Isa lolametaó, "Wau laito hemo bisala wolo juujulu totalu lotaa dadaata. Wau laito hemo ngaajali tobele potabiyaalo wau to Bele lo Allahu Taála, tambati taulo Yahudi u biasaalio hemo ambuwa. Diila peéenta maó Wau helo bisala wolo-wolo lou tuuáaó-tuuáaó. **21** Oditolio yilongola ti Tuani hemohintu mai olaa-Tia? Yintuwalo maó olimongolio tamaa loódungohe olaa-Tia helo ngaajali. Tantu otaawa limongolio wolo u yiloiyaa-U maó." **22** Tou ti Isa lotahuda maó odito, tala ngota lo tamoo-kawalia teto, lolambali o-Lio wau loloiya, "Buheli daá Yio mobisala debo odelo uito odeli iimamu daá!" **23** Ti Isa lolametaó, "Wonu Wau mobisala mai hitua-tuawua utalatala, poleleaalo mai tewe wolo totalaalio! Bo wonu u pilolele-U mai boito memangi otutu, yilongola yio lolambali ola-U?" **24** Lapataó tei Hanas lopoáhu talodelo mota li Isa wolo pungu-pungu odeli iimamu Daá Kayapas. **25** Tei Simon Petrus olo donggo tihutihula hemo tidengengo teto. Tau-tauwalo loloiya maó olio. "Diila mayio-yioolo muri lotau boito?" Bo tei Petrus lomaheó, ualio maó, "Diila!" **26** Wato ngota li iimamu daá, deuuto-yito ilaato lotaa bulongalio pilutu maó lei Petrus, loloiya, "Wolo diila wau taloóonto olemu to ilengi u pilomuloa lo bubuu-ngawaalo boito peé-peéenta wo-Lio?" **27** Lapataó tei Petrus luli lomaheó, "Diila" -- wau tiluhata tou boi-boitolo maluó malo kuukuyuu mai. **28** Didimodupo daá timongolio lodelo mota li Isa lonto bele lei Kayapas ode bele biluloá saaha li Gubolonulu. Tau-tauwalo Yahudi lohihilao diila tilumuwoto ode delomo bele biluloá saaha li olongia, alihu timongolio diila mowali najisi moduduó dudelo lo agama, sababu timongolio ohilaa molamela uáalo lo Paska. **29** Sababu uito tei Pilatus yilumualaó ode bulemengio ode limongolio wau lohintu maó, "Wolo dudulohumu totau botie?" **30** Timongolio lolametaó, "Humayaalio Tio diila ototala, amiaatia diila talodelo mai o-Lio odeli Paaá Gubolonulu." **31** Tei Pilatus loiya maó olimongolio, "Hamaalo mota Tio wau butoilo maó Tio moduduó butoi mongoli lohihilao!" Bo tau-tauwalo Yahudi boito

lolametaó, "Amiaatia diila mowali mohukuumani mate totau." ( **32** Utie motoduo alihu pohupohutu wolo upilo tahuda li Isa tomimbihu pohuliilio tou Tio maamate maó.) **33** Tei Pilatus luli tilumuwoto ode bele biluloá saaha li olongia wau lotiangaó li Isa, lapataó malohintu, "Wolo Yio olongia taulo Yahudi?" **34** Ti Isa lolametaó, "Wolo yiyintu botie lonto olemu lohihilao meaalo woluo taawewo tamalo poótaa mai olemu tomimbihu ola-U?" **35** Tei Pilatus lolametaó, "Wolo wau botie taulo Yahudi? Tamalohudu mai ole-Mu ode olaú yito bangusaa-Mu lohihilao wau mongo iimamu tauwa. Wolo umaa pilohutu-Mu?" **36** Tametaó li Isa, "Yilaidiaa-U diila lonto dunia botie. Humayaalio yilaidiaa-U lonto dunia botie, tautau-U mamohipate alihu Wau diila tawuduolio ode tahidihima kawasa lo Yahudi. Bo memangi yilaidiaa-U diila lonto dunia botie!" **37** Yi tei Pilatus lohintu maó o-Lio, "Wonu odito, Yio botie olongia?" Ti Isa lolametaó, "Yio loloiya deu Wau botie olongia. Wau pilotutulio wau dungga-dungga mai ode dunia wolo makusudu tuwau, deuuto-yito mai mongohi sakusi pasali lo obobanali. Taa monto obobanali boito mamongohe ola-U." **38** Tei Pilatus lohintu o-Lio, "Wolo boliilio obobanali?" Lapataó tei Pilatus luli yilumualo lonto bele biluloá saaha li olongia wau loloiya maó ode tau-tauwalo Yahudi, "Wau diila loótapu totala penu boli tuwau maó lonto o-Lio. **39** Bo moduduáaó obobiasa limongoli, wau laito hemo lopato ngotaalio lotaa hihukuu-mania to Dulahu Buka Paska. Wolo mohuto timongoli alihu wau molopataó oli olongia taulo Yahudi botie ode limongoli?" **40** Timongolio lolametaó wolo hiwaatia, "Diila, diila Tio, bo tei Barabas!" (Tei Barabas yito ngotaalio tamoo-lambata.)

**19:1** Lapataó tei Pilatus tilumuwotaó tulusi lopoáhu tau mota lomuboá li Isa. **2** Mongo pajule lohutu maó makuta lonto tataa-ngowaalo kekeei u oduhi, lapataó lopohuli to lunggongi Isa, lapataó uito timongolio lopopake maó o-Lio jumba lailoumu, **3** tulusi wuwuulia timongolio hiponaówa mai ode o-Lio wau helo loiya maó, "Pomali-tutuólo mola olongia taulo Yahudi!" Lapataó timongolio helo lambali o-Lio. **4** Lapataó uito tei Pilatus peéntapo yilumualai wau loloiya ode taa dadaata, "Bilohilo! Wau lodelo mai o-Lio ode bulemengio ode limongoli, alihu otaawa maó limongoli Tio

diila piloo tapulai totala penu boli tuwau maó." **5** Yi ti Isa yilumualao wolo pakepake makuta duhi wau jumba lailoumu. Lapatao tei Pilatus loloiya ode limongolio, "Bilohilo tau boito." **6** Tou mongo iimamu tauwa wau tahi pokawalia boito loonto li Isa, timongolio malo nguwatío mola, "Salipuwalo Tio! Salipuwalo Tio!" Tei Pilatus loloiya maó ode limongolio, "Hamaawa mota Tio, wau salipuwalo limongoli lohihilao, Tio diila piloo tapulai totala penu boli tuwau maó." **7** Tau-tauwalo Yahudi boito lolametao, "Moduduá butoo lamiaatia Tio musi hukuu-maniyolo mate-mateelo maó sababu Tio longaku batanga-Lio Walaó Allahu Taála." **8** Tou tei Pilatus loodungohe olimongolio loloiya odito, yi malebe yiloohe tio. **9** Yi tio luli tilumuwoto ode delomo bele biluloá saaha li onlongia wau lapatao ti Isa pilotuotio mai, tei Pilatus lohintu maó o-Lio, "Lonto utoonu mai asalii-Mu?" Boti Isa diila lolameto. **10** Oditolio tei Pilatus luli loloiya maó, "Yio diila mohuto mobisala wolau? Ototai maó wau okawasa molopata ole-Mu, wau okawasa moposalipu ole-Mu!" **11** Ti Isa lolametao, "Wonu Allahu Taála diila mongohi mai kawasa boito olemu, yio sama-samaata diila okawasa ola-U. Sababu uito talohudu mai ola-U ode olemu, lebe udaá maó dusalio wolemu." **12** Tou tei Pilatus loodungohe uito, tio helo tolopani u molopata o-Lio. Bo tau-tauwalo Yahudi mahiwatia, "Wonu ti Tuani molopata o-Lio, ti Tuani diila sahabati li Kaisari! Taa motolongaku batangalio onlongia, tau boito musu li Kaisari!" **13** Tou tei Pilatus loodungohe tataa-heyalo boito, tio malodelo li Isa ode bulemengio lapatao lotihuloaa tokadera lobubutoo totambati u ilunte Wumbato Botu. (To delomo bahasa lo Ibrani ilunteelio Gabata.) **14** Tou boito dulahu wimbideo totai, dulahu tou diipo Dulahu Buka Paska. Tei Pilatus loloiya maó ode tau-tauwala boito, "Taboti-botieelo onlongiyamu!" **15** Timongolio hiwuwa-wuwaatia, "Pateyalo Tio mate-mateelo maó! Pateyalo Tio mate-mateelo maó! Salipuwalo Tio!" Tei Pilatus lohintu maó, "Tingga wajibu wau mosalipu maó onlongia limongoli?" Mongo iimamu tauwa malo lametao, "Boti Kaisari wambaó tuwa-tuwaulo onlongia lamiaatia!" **16** Yi tei Pilatus malohudu li Isa ode limongolio mota silalipulio. Timongolio malohama li Isa tulusi dilelolio mota. **17** Ti Isa yilumualai wolo potapota lohihilao salipu-Lio ode tambati u ilunte

"Tambati lo Bakakau". (Todelomo bahasa lo Ibrani ilunte Golgota.) **18** Mota teto Tio silalipulio. Pee-peenta wo-Lio woluo olo duulota wewo tasilalipu; taangota to ambahu olohi, taangota to ambahu olowala wau ti Isa tohuungio. **19** To ayu salipu li Isa, tei Pilatus lei tuladeo odie: "Ti Isa lonto Najaret, Olongia taulo Yahudi". **20** Dadaata taulo Yahudi loobaca maó u tulatuladu boito, sababu tambati upilo salipua li Isa boito diila molamingo monto kota. Tuladu boito todelomo bahasa lo Ibrani, Latini wau Yunani. **21** Mongo iimamu tauwa malo loiya odelei Pilatus, "Diila maó tulade 'Olongia taulo Yahudi', bo tulade maó, 'Tau botie loloiya, Wau Olongia taulo Yahudi.'" **22** Bo tei Pilatus lolametao, "U maa tiluladuu, hulialo maó debo tulatuladu." **23** Lapatao mongo pajule boito lopo salipu li Isa, timongolio malohama boó-Lio. Pakeyangi boito tilayadio wopato: ngota-ngota lootapu ngotayadu. Hilama limongolio olo jumba-Lio. Jumba boito diila odetumalio -- hilewolio lonto yitaato demola tibawa. **24** Mongo pajule boito malo loiya ngota timongota, "Diila maó kede-kedenganto jumba botie. Dulo undionto u molantu tatoonu tamootapu maó." Suáli boito motoduo mai alihu pohupohutu wolo u tulatuladu todelomo Kitabi, deuito-yito: "Timongolio malo laya-layade boó-U, wau longundi jumba-U." Wau memangi mongo pajule boito lohutu maó odito. **25** Totili losalipu li Isa tihutihulo tiilo li Isa, wutatiilo-Lio taabua, ti Maria dile lei Kleopas, wau ti Maria Mahadalena. **26** Tou ti Isa loonto oliilo-Lio wau muri tapilonu-Lio tihutihula teto, Tio loloiya maó oliilo-Lio, "Maama uito walai Maama." **27** Lapatao ti Isa lotahuda maó tomuri-Lio boito, "Uito ibumu." Tonggadio tou boito muri boito lololimo oliilo li Isa u lotibiluloa tobelelio. **28** Otaawa li Isa deu botia mailapato ngoamilalo, wau alihu wolo u tulatuladu todelomo Kitabi mowali motoduo mai, Tio malo tahuda "Wau mototoango." **29** Teto woluo manggo tuwau polupolu lo angguru molotingo. Yi bunga lopatihuh tuwau pilopo lomolio todelomo angguru boito, wau tiluwohio tohisop ngopangge, tulusi piloheduio mola ode biihio li Isa. **30** Ti Isa lolamitaó angguru boito tulusi lotahuda, "Mailapato!" Tulusi Tio lotidungu mola wau yilate. **31** Tahidihima kawasa lo Yahudi diila mohuto milate lotau-tauwalo tahi salipua boito debo hintayanga to ayu salipu todulahu Saabati, tidiyolo maó peenta botie Sabaati boito

Dulahu Buka utolo-tolomodu. Sababu dulahu tou ti Isa silalipulio lotaahua tou diipo dulahu Saabati boito, tau-tauwalo Yahudi lohile luasia olei Pilatus u mota momoli oáato lotau-tauwala tahe silalipulio boito wau mopolaahi mimii-lateyaalo boito monto ayu salipu. **32** Yi mongo pajule boito lonaó mota wau lomoli bohulio oáato lo taduulota tasilalipu peé-peéenta woli Isa. **33** Tou timongolio leitungga odeli Isa, iloontonga limongolio Tio mailate. Oditolio timongolio diila lomata lomoli oáa-Tio. **34** Bo tutuálobu li Isa hebiletuio wolo totobuó lo ngotaalio lomongo pajule boito; wau huáa yilumualai duhu wau taluhu. **35** Taa loóonto lohihilao u lotoduo boito, tio-tiolo talo pohabari suáli boito, alihu timongoli olo palacaya. Wau u silakusialio boito otutu, wau otaawalio deu uito otutu. **36** Suáli boito motoduo mai alihu pohupohutu wolo u tulatuladu todelomo Kitabi, deúito-yito "Diaaluo penu boli tuwau maó tulalio maboliyolo". **37** Todelomo Kitabi olo tulatuladu, "Timongolio mamooonto o-Lio tamaa biletui mongolio". **38** Lapataó uito tei Yusu lonto Arimatea lohile maó luasi olei Pilatus u mota lohama milate li Isa. (Tei Yusu yito muri li Isa, bo wolo tutuuó, sababu tio moohe to tahidihima kawasa lo Yahudi.) Tei Pilatus longohi maó luasi olio, oditolio tio mota lohama milate li Isa. **39** Tei Nikodemus, tamuloolo mapeéenta lonaó mai odeli Isa tou hui, lonaó olo peé-peéenta wolei Yusu. Tei Nikodemus lodelo pidelo damahu moonu wau gaharu -- Ngoáamilalo otanu tolo pulu lokilo daatalio. **40** Taduuulota boito lohama milate li Isa tulusi lolaputaó wolo latu peé-peéenta wolo pidelo moonu boito loduduá uudu polobungalo tauo Yahudi. **41** Totambati pilo salipua li Isa woluo ilengi u pilomulua lo bubuu-ngawaalo tuwau. To ilengi u pilomulua lo bubuu-ngawaalo boito woluo kuubulu bohu, udiipo peéenta maó pilomake pilolobunga tau. **42** Sababu kuubulu boito membidu, wau dulahu Saabati bolo ngopeé mola tumulalio, timongolio malo lobunga li Isa mola teto.

**20:1** Todulahu ahadi dimodupo, tou donggo modiolomo, ti Maria Mahadalena lonaó ode kuubulu. Tio loóonto maó botu poheutio mahileilio lonto huango kuubulu boito. **2** Yi tio tilumeteó malo lolohe olei Simon Petrus wau muri tapilonu li Isa, wau loloiya maó olimongolio, "Eeya

mahilama lotau lonto kuubulu, wau diila otaawa laatia toutoonu Tio pilopo balatio." **3** Tulusi tei Petrus wau muri wewo boito malonaó ode kuubulu. **4** Duduulotalo hiteteá, bo muri wewo boito lebe molinggaheó wolei Petrus, wau tio leitungga mola leimulo tokuubulu. **5** Tio lomilohe mola ode delomo kuubulu wau loóonto latu dutudutu teto, bo tio diila tilumuwota mola. **6** Tei Simon-Petrus tunu-tunuhe lonto wulea, tulusi lato tilumuwota mola ode delomo kuubulu boito. Tio loóonto maó latu dutudutu teto, **7** bo kaingi u pilolihutio to lunggongi Isa diaaluo to tiliilio bo leililibe wiwiwiwi. **8** Lapataó muri tamaa leimulo tilunggulaó ode kuubulu, tilumuwota mola olo. Tio loóonto maó wau palacaya. (**9** Tunggula tou boito timongolio diipo mongalati wolo u tulatuladu todelomo Kitabi deú Tio musi mobongu mai monto opopate.) **10** Lapataó uito tahiduduá li Isa boito malo hualingo. **11** Ti Maria Mahadalena tilimihulaó totalu lokuubulu sambela hiyo-hiyongo. Tou donggo hiyo-hiyongo, tio lomilohe mola ode delomo kuubulu, **12** lapataó maloóonto malaikati duulota hipakea moputio. Timongolio boito hihuloáa tobakasi lotambati milate li Isa, ngota towimbihu lunggongo wau tawewolio towimbihu oáato. **13** Mamaa-laikatiyalo boito lohintu maó, "Ibu yilongola hiyo-hiyongo?" Ti Maria lolametaó, "Eeya lowatia mahilamatio, wau diila otaawa lowatia toutoonu Tio pilopo balatio." **14** Lapataó tio loloiya maó odito, tio loili ode wulea wau loóonto li Isa tihutihula teto. Bo diila otaawatio deú taboitolo ti Isa. **15** Ti Isa lohintu maó olio, "Ibu, yilongola hiyo-hiyongo? Ti Ibu hemo lolohe olita?" Ti Maria hemo lantobu tau boito tamomengia, oditolio tio loloiya maó, "Paaá, wonu ti Paaá talopo limbata o-Lio lonteea, tulungia polelea mai olaatia toutoonu pilopo balata li Paaá o-Lio, alihu watia mowali mohama o-Lio." **16** Ti Isa lotahuda maó olio, "Maria!" Ti Maria loili maó odeli Isa tulusi loloiya todelomo bahasa lo Ibrani, "Rabuni!" (Boliilio maó "Guru".) **17** "Diila maó dihima Wau," tahuda li Isa olio, "Sababu Wau diipo lobotula mola odeli Paapa. Bo ponaólo mota ode mongo wutatu-U, wau polelea maó olimongolio deú botia Wau mamobotula mola odeli Paapa-U wau odeli Paapamu, Allahu Taaala-U wau Allahu Taaalamu." **18** Yi ti Maria malonaó lopoótaa to tahiduduá li Isa deú tio maloóonto Eeya wau deú Eeya malo tahuda mai ngoáamilalo boito

olio. **19** Todulahu ahadi boitolo, tou maahui, tahidudua li Isa lotiambu maó tobele ngowale wolo huhuu-hebuwaalo hiuntia, sababu timongolio moohe to tahidihima kawasa lo Yahudi. Debolo ti Isa lonaó mai wau tilimihulaó tohuungi mongolio wau lotahuda, "Salamu moáahu olemu." **20** Lapataó lotahuda odito, ti Isa lopo biloheó olimongolio uluu wau tutuálobe-Lio. Tou loóonto maó to Eeya, timongolio lengahee daá. **21** Lapataó ti Isa peéentapo lotahuda maó olimongolio, "Salamu moáahu olemu. Debo odelo ti Paapa-U lolao mai ola-U, odito olo Wau mamolao olimongoli." **22** Lapataó ti Isa lopo hiipaó napasi-Lio ode limongolio wau lotahuda maó, "Tolimowalo Rohullah. **23** Wonu timongoli mongambungu dusa lo tahingota-ngotaawa, Allahu Taáala olo mongambungu mai olio. Wonu timongoli diila mongambungu dusa lo tahingota-ngotaawa, Allahu Taáala olo diila mongambungu olio." **24** Tei Tomas (tailunte "Pingi") ngotaalio lo tamo pulaa duulota muri li Isa, diaaluo peé-peéenta wolo tawewo tou ti Isa leidungga mai. **25** Yi tahidudua li Isa wewolio loloiya maó odelei Tomas, "Ami maloóonto Eeya!" Bo tei Tomas lolametaó, "Wonu watia diipo loóonto bakasi lopaku to uluu-Lio, diipo lopodutu tingoonga lo uluu laatia to babaa kasiyalo pali lopaku boito wau diipo lopodutu uluu laatia to tutuálobe-Lio sama-samaata watia diila mohuto palacaya." **26** Ngodiminggu lapatio maó tahidudua li Isa woluo poli totambati boito, wau tei Tomasi woluo olo. Huhebu ngoáamila hiuntia. Boti Isa malonaó mai wau tilimihulaó tohuungi mongolio, lapataó lotahuda, "Salamu moáahu olemu." **27** Lapataó ti Isa lotahuda odelei Tomas, "Bilohilo mai uluuu-U, wau podutua mai tingoonga lo uluúmu teea. Wudua mai uluúmu wau podutua to tutuálobe-U. Diila maó polingu poli, bo pomalacayalo!" **28** Tei Tomas malo loiya odeli Isa, "Eeyau wau Allahu Taáalaú!" **29** Yi ti Isa lotahuda maó olio, "Yio palacaya sababu maloóonto ola-U, diila odito? Potisanangilo tutu taa palacaya eleponu diila moóonto ola-U!" **30** Debo donggo dadaata poli totoonulalo moólinggolabe wewo u hepilohutu li Isa totalu lo tahidudua o-Lio, bo diila tiluladio todelomo buku botie. **31** Bo ngoáamilalo botie tiluladio mai, alihu timongoli palacaya deu ti Isa yito Olongia Tamoo-poáhua, Walaó Allahu Taáala, wau sababu palacaya to o-Lio, timongoli mamootapu tutumulo.



**21:1** Lapatao uito ti Isa lopobilohe batanga peentapo to Bulalo Tiberias to tahiduduá o-Lio. Odie mola waliilio: **2** Tou dulahee tuwau tei Simon Petrus, tei Tomas tailunte Pingi, tei Natanael lonto Kana to Galilea, mongo walaée Jebedeus wau duulota muri li Isa tawewolio, donggo hiambua. **3** Ualei Simon Petrus ode tawewo, "Watia motohilaa mota moheupa tola." "Ami moduduó," loiya maó limongolio olio. Yi malonaó timongolio lotitaé tobulotu. Bo ilo-iloonua lou hui boito timongolio diila loó waupa wolo-wolo. **4** Tou dulahu malobutu mai, ti Isa tilimihulaó to pentadu, bo diila ilotaawa limongolio deu taboitolo ti Isa. **5** Ti Isa lotahuda maó olimongolio, "Mongo walaó, wolo timongoli otola?" "Diaaluo," tametaó limongolio. **6** Ti Isa lotahuda maó olimongolio, "Pomahulalo mota pajalamu ode ambahu olowala lobulotu, alihu timongoli moótapu mai tola." Tulusi pajala boito pilomahulio mota limongolio, bo timongolio diilalo mambo lomantangai pajala boito sababu malo odito daatalio lotola todelomio. **7** Muri tapilonu li Isa loloiya maó odelei Petrus, "Uito Eeya!" Tou tei Simon Petrus loódungohe deu uito Eeya, tio malo pomake mola boolio (sababu tio diila boóboó) tulusi lotidehulo mola ode delomo taluhu. **8** Tahiduduá wewo lolunuheó ode tudulio wolo bulotu, sambela hipo mantanga pajala u polupolu wolo tola. Timongolio diila boti molamingo monto tudulio, tanu bo ngohetuto meeteri lamingio. **9** Tou timongolio lolaahé lonto bulotu, iloontonga limongolio woluo bohu lotulu mola teto wolo tola toitaatio wau roti. **10** Ti Isa lotahuda maó olimongolio, "Nte deloa mai odia tola ngoolo botu u heli yilaupai limongoli." **11** Tei Simon Petrus malotitaé mola tobulotu, tulusi lodedeáa pajala ode tudulio. Pajala boito polupolu wolo tola u duduulaa; ngoáamilalo woluo ngohetuto limo lopulaa tolo botu. Wau eleponu odito daatalio, pajala boito diila lokaidingo. **12** Ti Isa lotahuda maó olimongolio, "Dulo molamelo." Diaaluo penu boli ngotaa maó lo tahiduduá o-Lio buheli lohintu, "Ti Paaá tatoonu?" Sababu otaawa limongolio deu Tio Eeya. **13** Lapatao ti Isa lohimbideó olimongolio, wau lohama roti boito, wau yiludu-Lio olimongolio. Tio malohutu odito olo wolo tola boito. **14** Uti-utieelo otolulio ti Isa lopo biloheó batanga-Lio ode tahiduduá o-Lio lapatao Tio bilongu-Lio mai tou yilate maó. **15** Lapatio maó lolamelo, ti Isa lotahuda

odelei Simon Petrus, "Simon, walaée Yona, wolo yio lebe motolianga ola-U wolo toliangi mongolio ola-U?" "Otutu, Eeya," tametao lei Petrus, "Otaawa lo Eeya watotia motoliango to Eeya." Ti Isa lotahuda olio, "Biyaeelo mongo walaó himba-U." **16** U oluolio ti Isa lohintu olio, "Simon walaée Yona, wolo yio motoliango ola-U?" "Otutu, Eeya," tametao lei Petrus, "Otaawa lo Eeya watotia motoliango to Eeya." Ti Isa luli lotahuda olio, "Biyaeelo ngoáamila himba-U." **17** U otolulio ti Isa luli lotahuda maó olio, "Simon walaée Yona, wolo yio motoliango ola-U?" Tei Petrus masiluukali sababu ti Isa malohintu olio tunggula poóotolu. Yi tei Petrus luli lolametao, "Eeya, otaawa lo Eeya totoonulalo u hitua-tuawua. Otaawa lo Eeya watotia motoliango to Eeya!" Tulusi ti Isa lotahuda olio, "Biyaeelo ngoáamila himba-U. **18** Otutu banali tahudaa-U botie: Tou yio donggo muda mai, yio lohihilao lomintolo wohutamu, wau lolontale penu boli ode utoonu u otohilaamu. Bo wonu yio de mapanggola mola, yio mamohudu maó uluúmu, wau taawewo tamo ngawade olemu wau modelo olemu ode utoonu udiila otohila naóomu." **19** (Wolo tataa-heyaalo boito ti Isa mopo biloheo woloolo mola tei Petrus dewonu mate maó u mopoudaa mola Allahu Taaala.) Lapatao uito ti Isa lotahuda maó odelei Petrus, "Duduilo mai Wau!" **20** Tou tei Petrus loili mota, tio loóonto to wuleaalio muri tapilonu li Isa. (Tio-tiolo talo tihuloaa totili li Isa tou donggo hemo lamelo wau talohintu o-Lio, "Eeya tatoonu tamaa mohiyanti to Eeya?") **21** Loóonto olio, tei Petrus malohintu li Isa, "Eeya, woloolo mola wolio botie?" **22** Ti Isa lolametao, "Wonu humayaalio Wau mohuto u tio debo tumutumulo tunggula odungga-U mai, uito diila uluusanimu. Bo yio poduduolo mai ola-U!" **23** Yi lolooladulo mola habari tohuungo lo tahidudua li Isa deu muri boito diila tamaate. Lebe-lebe pomaó ti Isa diila lotahuda deu muri boito diila taamate, bo: "Humayaalio Wau mohuto u tio debo tumutumulo tunggula odungga-U mai, uito diila uluusanimu." **24** Muri boi-boitolo talongohi sakusi pasali popoolutiyaalo botie. Tio-tiolo olo tamaa loluladeo. Wau otaawanto deu wolo uiloiyaalio boito otutu. **25** Donggo dadaata suali wewo u hepilohutu li Isa. Humayaalio ngoáamilalo boito tuladulo tuwau-tuwau, pongolaasa laatia diila moótuheo tambati to ngoilanggubu dunia u modetoheo ngoáamila

buku umaa tuladulo boito.